

遊城南記
入蜀記

趙子昂所撰書藏書良匪易事
中實奇精無淨凡毋益腦毋新向
心以發揚極母以夜刺毋以作
開隨掩後得吾書者并奉贈以
廣祕笈全部五十種內闕五種十八本
大波府 臨州堂收藏

4曾1
515
11



遊
城
酒
局

僧
515
11

遊城南記

陳眉公訂正遊城南記

宋張禮茂中撰注

明沈孚先白生

校

張應世名之

元祐改元季春戊申明微茂中同出京兆之東南門

張注曰唐皇城之安上門也至德二載改爲先天門尋復舊肅宗以祿山國讐惡聞其姓



京兆坊里有安字者率易之○續注曰志總
序云唐開元元年改雍州爲京兆府以京城
爲西京天祐元年昭宗東遷降爲佑國軍梁
開平元年改府曰大安越二年改軍曰永平
後唐同光元年復爲西京晉天福元年改軍
曰晉昌漢乾祐元年改軍曰永興其府名皆
仍舊有宋因之故其南北相值之街亦曰安
歷興道務本二坊

張注曰興道坊在安上門街之西景龍三年
改瑤林坊務本坊在安上門街之東與興道
坊相對景龍二年改玉樓坊景雲元年並復
舊二坊之地今爲京兆東西門外之草市餘
爲民田

由務本西門入聖容院觀薦福寺塔

張注曰聖容院蓋唐薦福寺之院也今爲二
寺寺之浮圖今正謂之薦福寺塔尚存焉其

寺文明元年立謂之大獻佛寺天授元年改
爲薦福寺景龍中宮人率出錢起塔十五層
○續注曰貞祐乙亥歲塔之纏腰尚存辛卯
遷徙廢蕩殆盡惟磚塔在焉

南行至永樂坊

張注曰卽橫岡之第五爻也今謂之草場坡
古場存焉隋宇文愷城大興以城中有六大
岡東西橫亘象乾之六爻故于九二置宮室

以當帝王之居九三置百司以應君子之數
九五貴位不欲常人居之故置玄都觀大興
善寺以鎮之玄都觀在崇業坊大興善寺在
靖善坊其岡與永樂坊東西相直長安志云
坊東有裴度宅度欲入朝有張權輿上疏云
度名應圖讖宅據岡原蓋嘗有人與度作讖
云非衣小兒坦其腹天上有口被驅逐言度
曾討淮西平吳元濟宅據岡原與興善玄都

相連故也

東南至慈恩寺少遲登塔觀唐人留題

張注曰寺本隋無漏寺貞觀二十一年高宗
在春宮爲文德皇后立爲慈恩寺永徽三年
沙門玄奘起塔初惟五層磚表土心效西域
罕堵波卽袁宏漢記所謂浮圖祠也長安中
摧倒天后及王公施錢重加營建至十層其
云鴈塔者天竺記達觀國有迦葉佛伽藍穿

石山作塔五層最下一層作鴈形謂之鴈塔
蓋此意也嘉話錄謂張莒及進士第閒行慈
恩寺因書同年姓名于塔壁後以爲故事按
唐登科記有張台無張莒台于大中十三年
崔鋤下及第馮氏引之以爲自台始若以爲
張莒則台詩已有題名之說焉塔自兵火之
餘止存七層長興中西京留守安重霸再修
之判官王仁裕爲之記長安士庶每歲春時

遊者道路相屬熙寧中富民康生遺火經宵
不滅而遊人自此衰矣塔既經焚塗圯皆剝
而磚始露焉唐人墨迹於是畢見今孟郊舒
元輿之類尚存至其它不聞於後世者蓋不
可勝數也○續注曰正大遷徙寺宇廢毀殆
盡惟一塔儼然塔之東西兩龕唐褚遂良所
書聖教序及唐人題名記碑刻存焉西南一
里許有西平郡王李公晟先廟碑工部侍郎

張彥撰司業韓秀弼八分書字畫歷歷可讀
倚塔下瞰曲江宮殿樂遊燕喜之地皆爲野草
不覺有黍離麥秀之感

張注曰江以水汭屈曲故謂之曲江其深處
下不見底司馬相如賦曰臨曲江之隄洲蓋
其地也劇談曰曲江本秦隄洲唐開元中疏
鑿爲勝境江故有泉俗謂之漢武泉又引黃
渠之水以漲之泉在江之西旱而禱雨有應

今爲濱江農家湮塞然春秋積雨池中猶有
水焉黃渠水出義谷北上少陵原西北流經
三像寺鮑陂之東北今有亭子頭故巡渠亭
子也北入鮑陂鮑陂隋改曰杜陂以其近
杜陵也自鮑陂西北入穿蓬萊山注之曲江
由西北岸直西流經慈恩寺而西歐陽詹曲
江記其畧曰茲地循原北峙迴岡旁轉圓環
四匝中成坎窞窅窅洞生泉翕源東西三

里而遙南北三里而近崇山濬川鈎結盤護
不南不北湛然中停蕩惡舍和厚生蠲疾潤
虛抱景氣象澄鮮滌慮延歡棲神育靈觀此
可得其槩矣唐進士新及第者往往汎舟遊
宴于此文宗時曲江宮殿廢十之九帝因誦
杜甫哀江頭之詩慨然有意復升平故事太
和九年發左右神策軍三千人疏濬修紫雲
樓彩霞亭仍勅諸司有力建亭館者官給閒

地任營造焉今遺址尚多存者江水雖涸故
道可因若自甫張村引黃渠水經鮑陂以注
曲江則江景可復其舊不然疏其巴塞之泉
渟渚歲月亦可觀矣樂遊原亦曰園在曲江
之北卽秦宜春苑也漢宣帝起樂遊廟因以
爲名在唐京城內每歲晦日上巳重九士女
咸此登賞祓禊樂遊之南曲江之北新昌坊
有青龍寺北枕高原前對南山爲登眺之絕

勝賈島所謂行坐見南山是也

出寺涉黃渠上杏園望芙蓉園西行過杜祁公

家廟

張注曰杏園與慈恩寺南北相直唐新進士
多遊宴於此芙蓉園在曲江之西南隋離宮
也與杏園皆秦宜春下苑之地園內有池謂
之芙蓉池唐之南苑也杜祁公家廟咸通八
年建石室尚存俗曰杜相公讀書堂其石室

遊城南記
七
曰藏書龕○續注曰石室奉安神主之室也
出啓夏門覽南郊百神靈星三壇

張注曰啓夏門唐皇城之南門也北當皇城
之安上門少西蓋京城之南凡三門中曰明
德門今謂之五門西曰安化門今謂之三門
此其東門也三壇在門外西南二里百神靈
星二壇頗毀而圓丘特完南一里有蓮花村
未詳其所以名也○續注曰少西北有唐贈

戶部尚書楊貞公瑒廟碑晉公李林甫撰王
會書王敬從題額次東南有唐相國令狐氏
廟碑太和三年劉禹錫撰并書陳錫篆額楊
氏苗裔太和間尚盛人呼爲廟坡楊辛卯遷
移後無聞焉

次杜光村

張注曰杜光村有義善寺俗謂之杜光寺貞
觀十九年建蓋杜順禪師所生之地順解華

嚴經著法界觀居華嚴寺證圓寂今肉身
在華嚴寺

東南歷仇家庄

張注曰庄卽唐宦官仇士良別業也士良死
籍沒其家後晉錫晉昌軍節度使安彥威安
氏子孫世守之士良墓碑俱存其南爲郭子
儀墓西南長孫無忌之墓碑皆斷仆○續注
曰撫定後府南趙牛里皓陽觀主李可貞喬

志朴相過語余觀西北有两大碑云是郭氏
墓碑他日往觀其一壽州刺史郭敬之神道
碑敬之字敬之子儀父也以子儀貴贈太保
徐國公碑額御題韓國公苗晉卿撰序蕭華
書其一郭氏所尚昇平公主墓碑書撰姓名
失傳

過高望西南行至蕭灌墓讀碑

張注曰灌嵩之父也碑乃明皇題額張說爲

文梁升卿書嵩墓別塋張曲

由趙村訪章敬寺基經撥川王論弓仁墓

張注曰五代周太子太師致仕皇甫玄庄在趙村建隆二年置墓在村東碑在其庄內章敬寺長安志曰在通化門外本魚朝恩庄也後爲章敬皇后立寺故以爲名殿宇總四千一百三十間分四十八院以曲江亭館華清宮觀風樓百司行解及將相沒宮宅舍給其

用今此基不甚侈且與志所載地畝不同豈四十八院之一耶論弓仁者吐蕃普贊之族也世相普贊戎言爲宰相爲論因以爲氏聖曆三年以所統吐渾七千帳降唐累有戰功死贈撥川王塋趙村張說爲碑今已毀仆字無存者獨其題額在焉

下勳蔭坡入牛頭寺登長老文公禪堂夜宿寺之南軒

遊城南記
張注曰勲蔭坡今牛頭寺之坡也寺卽牛頭
山第一祖遍照禪師之居也貞元十一年建
內有徐士龍所撰碑太平興國中改寺曰福
昌元豐癸亥長老道文自南方來居于寺之
北堂其南軒爲延客之所今有朱公掞題壁
已酉謁龍堂循清明渠而西至皇子陂徘徊久
之

張注曰龍堂在牛頭寺之西寺故有龍泉塔

院此堂卽其地也泉北有塔俗稱龍堂坡地
甚平衍中多植杏謂之杏花坪見杜詡勝遊
錄清明渠隋開皇初引沉水西北流屈而東
流入城當大安坊南街又東流至安樂坊入
京城今其渠自朱坡東南分沉水穿杜牧之
九曲池循坡而西經牛頭寺下穿韓符庄西
過韋曲至渠北村西北流入京城皇子坡又
在龍堂之西秦葬皇子於坡底起塚於坡北

原上因以名坡隋文帝改永安坡唐復舊
覽韓鄭郊居至韋曲扣堯夫門上逍遙公讀書
臺尋所謂何將軍山林而不可見因思唐人之
居城南者往往舊蹟湮沒無所考求豈勝遺恨
哉

張注曰韓店卽韓昌黎城南雜題及送子符
讀書之地今爲里人楊氏所有鑿洞架閣引
泉爲池穿地得大鳴起信論碑之上篇鄭谷

庄在坡之西今爲里人李氏所有韋曲在韓
鄭庄之北堯夫進士韋師錫之字也世爲韋
曲人遠祖曼後周時居此蕭然自適與族人
處玄及安定梁曠爲放逸之友時人慕其閑
素號爲逍遙公明帝貽之詩曰香動秋蘭佩
風飄蓮葉衣北史有傳今其讀書臺

立逍遙谷則在驪山西南蓋亦慕曼而名之
也杜甫何將軍山林詩有不識南塘路今知

第五橋又曰憶過楊柳渚走馬定昆池今第五橋在韋曲之西與沈家橋相近定昆池在韋曲之北楊柳渚今不可考南塘按許渾詩云背嶺枕南塘其亦在韋曲之左右平嘗讀唐人詩集岑嘉州有杜陵別業終南別業而石鼈谷高冠谷皆有其居郎士元有吳村別業段覺有杜村閒居元微之亦有終南別業蕭氏有蘭陵里梁升卿有安定庄今皆湮沒

謾不可尋蓋不特何將軍山林而已

晚抵申店李氏園亭夜宿祁子虛書舍

張注曰申店夾滴水之兩溪李氏名之邵字

公材嘗爲進士祁子虛名徹李舍人壻也園

之東有閣曰秘春北有小軒曰明月

庚戌子虛邀飲韋氏會景堂及門圭人出迓明

微以爲不足子虛道其景且誦其詩明微聞之

始入其奧

張注曰韋氏名宗禮字中伯世爲下杜人蓋
唐相之裔家失其譜不知爲何房城南諸韋
聚處韋曲宜其屬系系易知然或東眷或西
眷或逍遙公或鄭公或南陂公或龍門公不
知其實何房也中伯博學好古葺治園亭奇
花異卉中莫不有日與賓客宴遊朝奉郎白
序題其堂曰會景中伯圃中有對金竹其狀
與對青相似長安有此竹者惟處士蘓季明

張恩道與中伯三家而已

復相率濟滴水陟神禾原西望香積寺塔原下
有樊川御宿之水交流謂之交水西合於灃北
入於渭

張注曰長安志曰滴水今名泥水一作坑水
自南山流至皇子陂今滴水不至皇子陂由
瓜洲村附神禾塹上穿申店而原愈高鑿原
而通深至八九十尺俗謂之坑河是也瓜洲

村之東北原上滴水北岸上尚有川流故道
西北過張王村之東又西北經內家橋又西
北經下杜城過沈家橋杜城之西有丈八溝
卽杜子美陪諸公子納涼遇雨之地滴水上
原西北流而合御宿川水是名交水在香積
寺之西南香積寺唐永隆二年建中多石象
塔碑中裂院中荒涼人鮮遊者

下原訪劉希古過瓜洲村

張注曰劉希古名舜才爲進士不第退居申
店滴水之陰瓜洲村俗以爲牧之種瓜之地
予讀許渾集有和淮南相公重遊瓜村別業
詩淮南相公杜佑也佑三子師損式方從郁
牧之從郁子也由此考之在佑已有瓜洲別
業則非牧之種瓜地明矣今村南原上有瓜
洲墓豈始有瓜洲人居此而名之耶亦猶長
安縣有高麗曲因高麗人居之而名也

復涉滴水遊范公五居

張注曰范公庄本唐岐國杜公佑郊居也門人權德輿爲之記纂叙幽勝極其形容舊史稱佑城南樊川有桂林亭卉木幽邃佑日與公卿宴集其間元和七年佑以太保致仕居此式方傳又云杜城有別墅亭館林池爲城南之最牧之之賦亦曰予之思歸今走杜陵之西道岩曲泉深地平木老隴雲秦樹風高

霜早周臺漢園斜陽衰草其地有九曲池池西有玉鈎亭許渾詩所謂九曲池西望月來池蹟尚存亭則不可考也又其地有七葉樹每朶七葉因以爲名羅隱詩所謂夏窻七葉連簷暗是也以是求之其景可知矣此庄向主爲杜氏所有後歸尚書郎胡拱辰熙寧中侍御史范巽之買此庄于胡故俗謂之御史庄中有溪柳岩軒江閣圃堂林館故又謂之五

東上朱坡憇華巖寺下瞰終南之勝霧巖玉案
圭峰紫閣紫在目前不待足履而盡也
張注曰朱坡在御史庄東華巖寺西牧之朱
坡三絕句極言其景華巖寺貞觀中建寺之
北原下瞰終南可盡其勝岑參詩所謂寺南
幾千峰峰翠青可掬是也終南一名太乙一
名地肺關中記曰終南太乙左右三百里內

居

爲福地柳宗元碑曰據天之中在都之南西
至於褒斜又西至於隴首以臨於戎東至於
商顏又東至於太華以距於關秦末四皓隱
於其間後因立廟唐文宗詔建終南山祠冊
爲廣惠公圭峰紫閣在祠之西圭峰下有草
堂寺唐僧宗密所居因號圭峰禪師紫閣之
陰卽漢陂杜甫詩曰紫閣峰陰入漢陂是也
太乙在祠之東霧岩玉案附麗而列二峰之

間有冰井經暑不消長安歲不藏冰夏則取水於此紫閣之東有高觀峪岑參作高寇蔣之奇作高官未知孰是

已而子虛希古開樽三門寺僧子齊出詩凡數百篇皆詠寺焉予賞蘓子美詩明微吟唐僧子蘭詩疎鍾搖雨脚積雨浸雲容之句及讀相國陳公悔把吾廬寄杜城之言則又知華巖之爲勝也酒闌過東閣閣以華巖有所蔽而登覽勝

之真如塔在焉謂之東閣以西有華巖寺故也今爲草堂別院

張注曰長安志曰真如塔在華巖寺今其塔在東閣法堂之北壁間二石記皆唐刻也具載華巖寺始末則華巖東閣本一寺也不知其後何以隸草堂焉

下閣至澄襟院院引北岩泉水架竹落庭注石盆中瑩徹可挹使人不覺頓忘俗意時子虛希

古先歸院之東元醫之居也予與明微宿焉
張注曰澄襟院唐左術僧錄遍覺大師智慧
之塔院也碑云起塔於萬年縣神禾鄉孫村
今屬鴻固鄉元醫世爲樊川人其居北倚高
坡泉聲泠泠竹陰相接圃中植花穴洞巖間
架閣池上茂林修竹與之隱映真有幽勝之
趣○續注曰澄襟院水久涸今爲長老濱巨
源衣鉢院莊則金興定辛巳間尚爲元氏之

居遷徙後遂無聞焉近代李構卽庄建閣鑿
洞立三清像遂呼爲三清閣兵後高竇老奉
披雲真人爲十方院門人樊志高盡有元莊
典刑雖在盛事則廢

辛亥歷廢延興寺過夏侯村王白二庄林泉
張注曰延興寺在楊萬坡斷碑遺址瓦礫遍
地興廢之由無可考今爲里人劉氏所有竹
木森蔚泉流清淺景勝元醫之居但不葺治

耳駙馬都尉王銑林泉在延興寺之東與朝
奉郎白序為鄰王氏林泉久不治白字聖均
莊有揮金堂順年堂疑夢室醉吟菴翠屏閣
寒泉亭辛夷亭桂崑亭今為王員外家所有
東次杜曲前瞻杜固盤桓移時

張注曰唐史稱杜正倫與城南諸杜素遠求
通譜不許銜之世傳杜固有王氣諸杜居之
衣冠世美及正倫執政建言鑿杜固通水以

利人既鑿川流如血閱十日方止自是南杜
稍不顯居杜固者謂之南杜以北有杜曲故
也杜固今謂之杜坡所鑿之處崖塹尚存俗
曰馬塨厓或曰鳳皇嘴不知何謂也杜氏世
葬少陵原司馬村之西南杜甫嘗稱杜曲諸
生少陵野老正謂杜曲少陵相近故也甫為
晉征南將軍預之後預玄孫某隨宋武帝南
遷遂為襄陽人甫曾祖某為鞏令又徙河南

遊城南言
宋孫洙爲甫傳以牧之爲甫族孫蓋同出於
預也是甫乃城南諸杜之裔耳然唐宰相世
系不載不知何故俟再考之

越姜保至興教寺上玉峰軒南望龍池廢寺

張注曰興教寺總章二年建有三藏玄奘慈
恩西明三塔寺倚北岡南對玉案峰元豐中
知京兆龍圖李公登眺於斯命僧創軒是名
玉峰擢萬年令陳正舉爲之記龍池寺直玉

案山之北○續注曰興教寺開成四年沙門
令總載修三藏塔銘屯田郎中兼侍御史劉
軻撰慈恩塔銘太子左庶子御史中丞李弘
度撰西明塔銘貢士宋復撰三藏塔奠中差
大右慈恩左西明差小殿宇法制精密莊嚴
過塔院抵韋趙覽牛相公樊鄉郊居

張注曰塔院者京兆開元寺福昌塔之莊也
俗謂之塔院修竹喬林森結參天池臺廢基

遊城南記
頗多不知在唐爲誰氏業俗傳國初狂人李
琰居之琰誅沒官後福昌塔成賜之爲常住
韋趙村有牛相僧孺郊居子孫尚有存者僧
孺八世祖某隋封奇章公長安城南下杜樊
鄉有賜田數頃書千卷僧孺居之依以爲學
後爲相與李德裕相惡門生故吏各相爲黨
先是泓陟相德裕宅爲玉碗僧孺宅爲金杯
且云金毀可作他器玉毀不復用矣其言果

驗然唐史傳方技者不載其事其亦闕文矣
乎

迺登少陵原西過司馬村穿三像院尋舊路暮
歸孫君中復之廬

張注曰長安志云少陵原南接中南山北直
澆水本爲鳳棲原漢許后塋少陵在司馬村
之東因卽其地呼少陵原杜牧之自志云塋
少陵司馬村柳宗元志伯妣墓曰塋萬年之

少陵原實鳳棲原也原脉起自南山曲屈西北岡阜相連纍纍不斷凡五十里然則鳳栖少陵其實一本因地異名耳漢總謂之洪固原今萬年縣有洪固鄉司馬村今在長安城之東南少陵在村之東北則滻水在東非在北矣少陵東接豐梁原或作鳳涼原滻水出焉東北對白鹿原荆谷水出焉二水合流入渭杜甫詩所謂登高素滻原是也少陵之東

原下卽滻水之西岸其地有泉舊傳有犢跑鳴而泉出今謂之鳴犢鎮三像寺開元中建背倚北原高數百尺始寺依原刻三大佛故名又云開原末爲武惠妃建武氏墓在鳳棲原長興坊與寺亦相近中復田家子今爲進士

壬子渡滻水而南上原觀乾湫憇塗山寺望翠微百塔子虛約遊五臺而與僕夫負行李者相

近城南言
失遂飲于御宿川之王渠醉還申店幾夜半矣
張注曰乾湫在神禾原皇甫村之東舊傳有
龍移去南山炭谷原之湫水遂涸故謂之乾
湫炭谷之水遂著靈異歷代崇爲太乙湫或
曰炭谷本太乙谷土人語急連呼之耳○續
注曰塗山寺在皇甫村神禾原之東南舊傳
皇甫村有三社曰鸞駕坪鳳皇臺及廢栖真
觀翠微寺在終南山上本太和宮武德八年

建貞觀十年廢廿年太宗厭禁內煩熱命將
作大匠闢立本再葺改爲翠華宮元和元年
廢爲翠微寺杜甫詩曰雲薄翠微寺則元和
之前固已謂之寺矣百塔在梗梓谷口唐信
行禪師塔院今謂之興教院唐裴行儉妻庫
狄氏嘗讀信行集錄及歿遷窆於終南山鳩
號堆信行塔之後由是異信行者往往歸葬
於此今小塔纍纍相比因謂之百塔塔東爲

石鼈谷廣惠神祠在焉西爲豹林谷种放隱
居之地放居今爲女冠所有蘓李明松門亦
在其西而董村者翠微寺下院也又在其西
自董村西行幾十里曰豐德寺豐德長老所
居今其寺猶有僧焉南五臺者曰觀音曰靈
應曰文殊曰普賢曰現身皆山峰卓立故名
五臺圓光寺王建集爲靈應臺寺陸長源辯
疑志爲慧光寺韓渥集爲神光寺今謂之圓

光寺五臺之北有留村數寺皆下院也御宿
川按楊雄傳曰武帝開上林南院至宜春鼎
湖昆吾傍南山而西至長楊五柞北繞黃山
瀕渭而東遊觀則止宿其中故曰御宿大抵
樊川御宿皆上林苑地也

癸丑詣張思道循原而東詣蓮花洞經裴相舊
居越幽州庄上道安洞祇炭谷旣行小雨而還
復尋會景堂清談終日

張注曰思道唐學士鶯之後居滴水之陰好
讀書善屬文雅麗有祖風自思道之居東行
五六里直樊川之上倚神禾原有洞曰蓮花
舊爲村人鄭氏之業鄭氏遠祖乾曜尚明皇
之女臨晉公主杜甫詩有宴鄭駙馬洞中云
主家陰洞細烟霧宜卽此地也自洞東行三
四里爲唐裴相國郊居林泉之勝亦樊川之
亞今爲鄱陽沈思之居又南行三里至幽州

庄李氏林亭李氏燕人也故以幽州名泉竹
之盛過沈庄矣南行四里至道安洞今爲尼
院院中起小塔西倚高崖東眺樊南之景舉
目可盡又南行七八里至炭谷自谷口穿雲
渡水躡亂石冒懸崖行十餘里數峰聳削蹙
道之半有司馬溫公隸書二十八字曰登山
有道徐行則不困擇平穩之地而置足則不
跌人莫不知之鮮能慎谷前太乙觀有希夷

先生所撰碑觀南爲故處士雷簡夫隱居地
甲寅北歸及內家橋子虛別焉予與明微自翠
臺庄由天門街上畢原西望三會寺定昆池迤
邐入明德門

張注曰內家橋今名也或曰雷家或曰能家
皆姓也橋之西又有沈家橋第五橋亦以姓
名羅隱城南雜感詩有賴家橋上瀟河邊之
句似當以能爲是翠臺庄不知其所以庄之

前有南北大路俗曰天門界北直京城之明
德門皇城之朱雀門宮城之承天門則界當
爲街俗呼之訛耳許渾有天門街望之詩可
據天門街當畢原之中長安志曰少陵原西
入長安縣界五里蓋畢原也志誤以爲少陵
西望三會寺寺邊有大塚世傳爲周穆王陵
北有池舊與昆明池相通唐爲放生池有臺
俗曰迦葉佛說法臺而傳記以爲蒼頡造書

臺景龍中中宗幸三會寺與羣臣賦詩上官
儋仔所謂釋子談經處軒臣刻字留是也定
昆池安樂公主之西庄也在京城之延平門
外景龍初命司農卿趙履溫將作少監楊務
廉爲園鑿沼延十數里時號定昆中宗臨幸
與羣臣賦詩

歷延祚光行道德永達四坊之地至崇業坊覽
玄都觀之遺基過岡論唐昌觀故事

張注曰唐昌觀又曰唐興觀在安業坊玄都
觀北中有玉藥花元和中_有仙子來觀嚴休
父元稹輩俱有倡和

旣而北行數里入含光門而歸焉實閏月十_六
張注曰城南之景有聞其名而失其地者有
具其名得其地而不知其所以者有見於近
世而未著於前代者若牛頭寺碑陰記永清
公主庄長安志載沙城鎮薛據南山別業羅

遊城南記
隱雜感詩有景星觀姚家園葉家林聞其名而失其地者也翠臺庄高望樓公主浮圖溫國塔朱坡具其名得其地而不得其所以者也楊舍人庄唯釋院神禾少陵兩原三清觀塗山寺陳氏昆仲報德廬劉翔集之濛溪劉子衷之樊谿五臺僧墳院見於近世而未著于前代者故皆略之以俟再考至於名蹟可據而暴于人之耳目者皆得以詳書焉

終

跋

古稷齋小山道人康棨

遊城南記一卷爲宋人所作記城南之景甚備中丞許少華先生手書之予得觀于張華原兄之家甚愛焉遂自錄一過後考他書始得著述者姓氏明微姓陳西楚人茂中姓張名禮澗右人博學好奇有足多者斯記也屬詞考事詳哉乎言夫宋去唐未遠而風景池亭猶有存者今門坊之名亦漫不可考矣嗚呼滄桑易變陵谷

難常後之遊者其將有取於斯文

<p>人</p>	<p>國</p>	<p>言</p>
----------	----------	----------

入蜀記

陳眉公訂正入蜀記卷之一

宋陸游務觀 著

明沈麟禎虎丞
沈德先天生 同校

乾道五年十二月六日得報差通判夔州方久
病未堪遠役謀以夏初離鄉里

六年閏五月十八日晚行夜至法雲寺兄弟餞
別五鼓始決去

十九日犁明至柯橋館見送客已時至錢清食
亭中涼爽如秋與諸子及送客步過浮橋橋
堅好非昔比亭亦華潔皆史丞相所建也申
後至蕭山縣憩夢筆驛驛在覺苑寺旁世傳
寺乃江文通舊居也有大碑葉道卿文寺額
及佛殿榜皆沈睿達所書有碑亦睿達書尤
精古又有毗陵人戚舜臣所畫水蓋佛後座
大壁也卒然見之覺濤瀾洶湧可駭前輩或

謂之死水過矣縣丞權縣事紀旬尉曾槃來
曾原伯逢招飲于其子槃廨中二鼓歸原伯
復來共坐驛門月如晝極涼四鼓解舟行至

西興鎮

二十日犁明渡江江平無波少休仙林寺寺僧
爲開館設湯飲遂買小舟出北閔登漕司所
假舟于紅亭稅務之西夜無蚊

二十一日省三兄

二十二日至二十四日皆留兄家

二十五日晚葉夢錫侍郎衡招飲案間設礬山

數盆望之如雪

二十六日晚芮國器司業擘招飲同集仲高兄

詹道子大著亢宗張叔潛編修淵坐中國器

云頃在廣東作漕有提舉茶鹽石端義者性
殘忍每捕官吏繫獄輒以石鹽木枷枷之蓋
木之至堅重者每曰木名石鹽天生此為我

用也其後石坐罪竟荷校云

二十七日

二十八日同仲高出閭門買小舟泛西湖至長

橋寺予不至臨安八年矣湖上園苑竹樹皆

老蒼高柳造天僧寺益葺而舊交多已散去

或貴不復相通為之絕嘆

二十九日沈持要檢正樞招飲邂逅趙德莊少

卿彥端晚出湧金門並湖繞城至舟中

三十日

六月一日早移舟出閘幾盡一日始能出三閘
船舫櫛比熱甚午後小雨熱不解泊糴場前
二日禺中解舟卿僕來言鄉中閔雨村落家家
車水比連三年頗稔今春父老言占歲可憂
不知終何如也過赤岸班荆館小休前亭班
荆者北使宿頓及賜燕之地距臨安三十六
里晚急雨頗涼宿臨平臨平者太師蔡京葬

其父準於此以錢塘江爲水會稽山爲案山
形如駝駝塋于駝之耳而築塔于駝之峰蓋
塋師云駝負重則行遠也然東坡先生樂府
固已云誰似臨平山上塔亭亭迎客西來送
客行則臨平有塔亦久矣當是蔡氏塋後增
築或遷之耳京責太子少保制云託祝聖而
飾臨平之山是也夜半解舟

三日犁明至長河堰亦小市也魚蟹甚富午後

入蜀言 卷一 四
至秀州崇德縣七令右從政郎具道夫丞右
承直郎李植監秀州都稅務右從政郎章湜
來舊聞戴子微云崇德有市人吳隱忽棄家
寓旅邸終日默坐一室室中惟一臥榻客至
共坐榻上或載酒過之亦不拒清談竟日隱
初不學問至是間與人言易數皆造精微亦
能先知人吉凶壽夭見者莫能測也因見吳
令問之云皆信然今徙居村落間矣是晚行

十八里宿石門火雲如山明日之熱可知也
四日熱甚午後始稍有風晚泊本覺寺前寺故
神霄宮也廢于兵火建炎後再修今猶甚草
創寺西廡有蓮池十餘畝飛橋小亭頗華潔
池中龜無數聞人聲皆集駢首仰視兒曹驚
之不去亭中有小碑乃郭功甫元祐中所作
醉翁操後自跋云見子瞻所作未工故賦之
亦可異也

五日早抵秀州見通判權郡事右通直郎朱自

求員外通判于承事郎直祕閣趙師夔方務

德侍郎滋務德留飯七罷還舟小憩極熱謁

樊自強主管樊自牧教授廣昂皆茂實吏部子聞人伯

卿教授阜民茂德剛定子二樊居城外居第頗壯茂

實晚歲所築尚未成也隔水有小園竹樹脩

茂荷池渺渺可喜池上有堂曰讀書堂游寶

華尼寺拜宣公祠堂有碑缺壞磨滅之餘時

時可讀蘇州刺史于頔書大略言祕書監陸

公齊望始作尼寺于此其後灞漣澧兄弟又

新之後又有賢妹字意者陸氏嘗有女子為

尼云然不言宣公所以有祠者家譜澧賴此證誤諱灞有

則宣公之父也老尼妙濟大師法淳及其弟子居白

留啜茶且言六新祠堂也移舟北門宣化亭

晚復過務德飯

六日右奉議郎新通判荆南呂援來援字彥能

入蜀言 卷一
進士聞人綱來綱字伯紀方務德館客自言
識毛德昭德昭名文衢州江山縣人居于秀
予兒時從之甚久德昭極苦學中年不幸病
盲而卒無子綱言其盲後猶終日危坐默誦
六經至數千言不已可哀也赴郡集于倅廨
中坐花月亭有小碑乃張先子野雲破月來
花弄影樂章云得句于此亭也晚赴方夷吾
導之集于陳大光縣丞家二樊呂倅皆在大

光字子充瑩中諫議孫居第潔雅末利花盛
開

七日早徧辭諸人赴方務德素飯晚移舟出城
泊禾興館前館亦頗闊壯終日大雨不止招
姜醫視家人及綯

八日雨霽極涼如深秋遇順風舟人始張帆過
合路居人繁夥賣鮓者尤衆道旁多軍中牧
馬運河水泛溢高于近村地至數尺兩岸皆

車出積水婦人兒童竭作亦或用牛婦人足踏水車手猶績麻不置過平望遇大雨暴風舟中盡濕少頃霽止宿八尺聞行舟有覆溺者小舟叩舷賣魚頗賤蚊如蠶蠹可畏

九日晴而風舟人懲昨夕狼狽不敢解舟日高方行自至崇德行大澤中至此始望見震澤遠山午間至吳江縣渡松江風極靜癯庵竹樹益茂而主人死矣知縣右承議郎管銳尉

右迪功郎周邗來縣治有石刻曾文清公漁具圖詩前知縣事柳楹所刻也漁具比松陵倡和集所載又增十事云託周尉招醫鄭端誠爲統絢脰脉皆病暑也市中賣魚鮓頗珍晚解舟中流回望長橋層塔烟波渺然真若圖畫宿尹橋登橋觀月

十日至平江以疾不入沿城過盤門望武丘樓塔正如吾鄉寶林爲之慨然宿楓橋寺前唐

人所謂半夜鐘聲到客船者

十一日五更發楓橋曉過許市居人極多至望亭小憩自是夾河皆長岡高壟多陸種菽粟或灌木叢篠氣象窘隘非楓橋以東比也近無錫縣始稍平曠夜泊縣驛近邑有錫山出錫漢末識記云有錫天下兵無錫天下清有錫天下爭無錫天下寧至今錫見輒捨之莫敢取者

十二日早謁喻子材郎中

子材來謝以兩夫

荷轎不持胡牀手自授謁云知縣右奉議郎吳澧來晚行夜四鼓至常州城外

十三日早入常州泊荆溪館夜月如晝與家人步月驛外綯始小愈

十四日早見知州右朝奉大夫李安國通判右朝奉郎蔣誼員外倅左朝散郎張堅堅文定公綱之子教授左文林郎陳伯達員外教授

左從政郎沈瀛司戶右從政郎許伯虎來伯
達字兼善瀛字子壽皆未識子壽仍出近文
一卷伯虎字子威余兒時筆硯之舊也至東
嶽廟觀古檣數百年物也又小憩崇勝寺納
涼遂解舟甲夜過奔牛閘宋明帝遣沈懷明
擊孔覲至奔牛築壘卽此也閘水湍激有聲
甚壯遂抵呂城閘自祖宗以來天下置堰軍
止四處而呂城及京口二閘在焉

十五日早過呂城閘始見獨轆小車過陵口見
大石獸偃仆道旁已殘缺蓋南朝陵墓齊明
帝時王敬則反至陵口慟哭而過是也予頃
嘗至宋文帝陵道路猶極廣石柱承露盤及
麒麟辟邪之類皆在柱上刻太祖文皇帝之
神道八字又至梁文帝陵文帝武帝父也亦
有二辟邪尚存其一爲藤蔓所纏若繫縛者
然陵已不可識矣其旁有皇業寺蓋史所謂

皇基寺也疑避唐諱所改二陵皆在丹陽距縣三十餘里郡士蔣元龍子雲謂予曰毛達可作守時有賣黃金石榴來禽者疑其盜捕得之果發梁陵所得夜抵丹陽古所謂曲阿或曰雲鳴謝康樂詩云朝日發雲陽落日到朱方蓋謂此也

十六日早發丹陽汲玉乳井水并在道旁觀音寺名列水晶色類牛乳皆冷熨齒井額陳文

忠公所作堆玉八分也寺前又有練光亭下闕練湖亦佳境距官道甚近然過客罕至是日見夜合花方開故山開過已用餘氣候不齊如此過夾岡有二石人植立岡上俗謂之石翁石媪其實亦古陵墓前物自京口抵錢塘梁陳以前不通漕至隋煬帝始鑿渠八百里皆闊十丈夾岡如連山蓋當時所積之土朝廷所以能駐蹕錢塘以有此渠耳汴與此

渠皆假手隋氏而爲吾宋之利豈亦有數耶
過新豐小憩李太白詩云南國新豐酒東山
小妓歌又唐人詩云再入新豐市猶聞舊酒
香皆謂此非長安之新豐也然長安之新豐
亦有名酒見王摩詰詩至今居民市肆頗盛
夜抵鎮江城外是日立秋
十七日平旦入鎮江泊船西驛見知府右朝散
郎直祕閣蔡洸子平都統慶遠軍節度使成

閔通判右朝奉大夫章汝右朝奉郎陶之真
府學教授左文林郎熊克總領司幹辦公事
右承奉郎史彌正端叔

十八日右奉議郎簽書節度判官廳公事葛郇
觀察推官右文林郎徐務滋司戶叅軍左迪
功郎楊冲焦山長老定園甘露長老化昭來
十九日金山長老寶印來字坦叔嘉州人言自
峽州以西灘不可勝計白傳詩所謂白狗到

入蜀記 卷一
黃牛灘如竹節稠是也赴蔡守飯于丹陽樓
熱特甚堆冰滿坐了無涼意蔡自點茶頗工
而茶殊下同坐熊教授建寧人云建茶舊雜
以米粉復更以薯蕷兩年來又更以楮芽與
茶味頗相入且多乳惟過梅則無復氣味矣
非精識者未易察也申後移舟出三閘至潮
閘而止

二十日遷入嘉州王知義船微雨極涼

二十一日

二十二日郡集衛公堂後圃比舊唯增染香亭
飲半登壽丘普照寺終宴壽丘者宋高祖宅
有故井尚存寺本名延慶隆興中復泗州有
普照寺僧奉僧伽像來歸寓焉因賜名普照
寺僑置僧伽道場東望京山連亘抱合勢如
繚牆官寺樓觀如畫西闕大江氣象極雄偉
也

入蜀記 卷一
二十三日 至甘露寺 飯僧甘露 蓋北固山也有
狼石 世傳以爲漢昭烈吳大帝嘗據此石共
謀曹氏 石亡已久 寺僧輒取一石充數 游客
摩挲太息 僧及童子輩往往竊笑也 拜李文
饒祠 登多景樓 亦非故趾 主僧化昭所築
下臨大江 淮南草木可數 登覽之勝 實過于
舊 邂逅左廸功郎新太平州教授徐容容字
子公 泉州人 此山多峭崖如削 然皆土也 國

史以爲石壁峭絕誤矣

二十四日

二十五日 早以一豨壺酒 謁英靈助順王祠 所
謂下元水府也 祠屬金山寺 寺常以二僧守
之 無他祝 史然勝云 賽祭猪頭 例歸本廟 觀
者無不笑 初紹興末 元顏亮入寇 樞密葉公
審言督視六軍 守江 禱於水府祠 請事平 奏
加帝號 旣而不果 隆興中 虜再入 有近臣申

言之議者謂四瀆止封王水府不應在四瀆
上乃但加美稱而已廟中遇武人王秀自言
博州人年五十一元顏亮寇邊時自河朔從
義軍攻下大名以待王師旣歸朝不見錄且
自言孤遠無路自通獻歎不已是晚欲出江
舟人詞以潮不應遂宿江口

二十六日五鼓發船是日舟人始伐鼓遂游金
山登玉鑑堂妙高臺皆窮極壯麗非昔比玉

鑑蓋取蘇儀甫詩云僧于玉鑑光中坐客蹋
金鼇背上行儀甫果終于翰苑當時以爲詩
識新作寺門亦甚雄翟耆年伯壽篆額然門
乃不可泊舟凡至寺中者皆由雄跨閣長老
寶印言舊額仁宗皇帝御飛白張之則風波
洶湧蛟鼉出沒遂藏之寺閣今不復存矣印
住山近十年興造皆其力寺有兩塔本曾子
宣丞相用西府俸所建以薦其先者政和中

入蜀記 卷一
寺爲神霄宮道士乃去塔上相輪而屋之謂
之鬱羅霄臺至是五十餘年印如復爲塔且
增飾之工尚未畢山絕頂有吞海亭取毛吞
巨海之意登望尤勝每北使來聘例延至此
亭烹茶金山與焦山相望皆名藍每爭雄長
焦山舊有吸江亭最爲佳處故此名吞海以
勝之可笑也夜風水薄船鞦韆有聲

二十七日留金山極涼冷印老言蜀中梁山軍
鷺鷥爲天下第一

二十八日夙興觀日出江中天水皆赤真偉觀
也因登雄跨閣觀二島左曰鵲山舊傳有栖
鵲今無有右曰雲根島皆特起不附山俗謂
之郭璞墓奉使金國起居郎范至能至山遣
人相招食于玉鑑堂至能名成大聖政 同
官相別八年今借資政殿大學士提舉萬壽
觀侍讀爲金國祈請使云午間過瓜洲江平

如鏡舟中望金山樓觀重複尤爲鉅麗中流
風雷大作電影騰掣止在江面去舟財夫餘
急繫纜俄而開霽遂至瓜洲自到京口無蚊
是夜蚊多始復設幙

二十九日泊瓜洲天氣澄爽南望京口月觀甘
露寺水府廟皆至近金山尤近可辨人眉目
也然江不可橫絕放舟西乃能達故渡者
皆遲回久之舟人以帆弊往姑蘇買帆是日

方至

檣高五丈六尺
帆二十六幅

兩日間閱往來渡者無

慮千人大抵多軍人也夜觀金山塔燈

七月一日犁明離瓜洲便風掛帆晚至真州泊
鑿遠亭州本唐揚州揚子縣之白沙鎮楊溥
有淮南徐溫自金陵來覲溥于白沙因改曰
迎鑾鎮或謂周世宗征淮時諸將嘗于此迎
謁非也國朝乾德中升爲建安軍祥符中建
玉清昭應宮卽軍之西北小山置冶鑄玉皇

聖祖太祖太宗四聖像既成遣丁謂李宗諤
爲迎奉副至京車駕出迎肆赦建軍曰真
州而于故治築儀真觀政和中修九域圖志
又名曰儀真郡舊以水陸之衝爲發運使治
所今廢

二日見知州右朝奉郎王察市邑官寺比數年
前頗盛携統游東園在東門外里餘自建
炎兵火後廢壞滌地漕司租與民歲入錢數

千昔之閎壯巨麗復爲荆棘荒墟之地者四
十餘年乃更葺爲園以記考之惟清醮堂拂
雲亭澄虛閣麓復其舊與右之清池北之高
臺尚存若所謂流水橫其前者湮塞僅如一
帶而百畝之園廢爲蔬畦者尚過半也可爲
太息登臺望下蜀諸山平遠可愛裴回久之
過報恩光孝寺少留辛巳之變儀真焚蕩無
餘而此寺獨存堂中僧百人長老妙湍常州

人

三日右迪功郎監稅務聞人堯民來堯民茂德
剛定之兒子以恩科入官北山永慶長老蘊
常來郡集于平易堂徧游澄瀾閣快哉亭遂
至壯觀以歸壯觀舊有米元章所作賦石刻
今亡矣初問王守儀真觀去城遠近云在城
南里許方怪與國史異旣歸亟往游則信城
南也有老道士出迎年七十餘自言廬州人

能述儀真本末云舊觀實在城西北數里小
山之麓祥符所鑄乃金銅像并座高三丈
以黃麾全仗道門幢節迎赴京師皆與國史
合故當時樂章曰范金肖像申嚴奉宮館狀
翬飛萬靈拱衛瑞烟披堤柳映黃麾道士又
言賜號瑞應福地則史所不載也今所謂儀
真觀者昔黃冠入城休憩道院耳晚大風舟
人增纜

入晉書 卷一
四日風便解纜掛帆發真州岸下舟相先後發者甚衆烟帆映山縹緲如畫有頃風愈厲舟行甚疾過瓜步山山蜿蜒蟠伏臨江起小峰頗巉峻絕頂有元魏太武廟廟前大木可三百年一井已智傳以爲太武所鑿不可知也太武以宋文帝元嘉二十七年南侵至瓜步建康戒嚴太武鑿瓜步山爲蟠道於其上設檀廬大會羣臣疑卽此地王文公詩所謂叢

祠瓜步認前朝是也梅聖俞題廟云魏武敗忘歸孤軍駐山頂按太武初未嘗敗聖俞誤以佛狸爲曹瞞耳山出瑪瑙石多虎豹害人往時大將劉寶每募人捕虎於此周世宗伐南唐齊王瓜景達自步渡江距六合二十里設柵亦此地也入夾行數里沿岸園疇衍沃廬舍竹樹極盛大抵多長蘆寺莊出夾望長廬樓塔重複自江淮兵火官寺民廬莫不殘

八景詩 卷一
三
壞獨此寺之盛不減承平至今日常數百衆
江面渺瀰無際殊可畏李太白詩云維舟至
長蘆目送烟雲高是也晚泊竹篠港有居民
二十餘家距金陵三十里

五日大風將曉覆袂衾晨起淒然如暮秋過龍
灣浪湧如山望石頭山不甚高無峭立江中
繚繞如垣墻凡舟皆由此下至建康故江左
有變必先固守石頭真控扼要地也自新河

入龍光門城上舊有賞心亭白鷺亭在門右
近又創二水亭在門左誠爲壯觀然賞心爲
二亭所蔽頗失往日登望之勝泊秦淮亭說
者以爲鍾阜艮山得庚水爲宗廟水秦鑿淮
本欲破金陵王氣然庚水反爲吉天下事信
非人力所能勝也見留守右朝請大夫祕閣
修撰唐瑑通判右朝散郎潘恕建康行宮在
天津橋北橋琢青石爲之頗精緻意其南唐

之舊也晚小雨右文林郎監大軍倉王烜來
王言京口人用七月六日爲七夕蓋南唐重
七夕而常以帝子鎮京口六日輒先乞巧翌
且馳入建康赴內燕故至今爲俗云然墳太
宗皇帝時嘗下詔禁以六日爲七夕則是北
俗亦如此此說恐不然

六日見左朝散大夫太府少卿總領兩淮財賦
沈夏武泰軍節度使建康諸軍都統郭振右

宣教郎知江寧縣何作善右文林郎觀察推
官褚意來作善字百祥意字誠叔晚見秦伯
和侍郎伯和名 故相益公檜之孫延坐畫
堂棟宇闕麗前臨大池池外卽御書閣蓋賜
第也家人病創託何令招醫劉仲寶視脉
七日早游天慶觀在冶城山之麓地理家以爲
此山脉絡自蔣山來不可知也吳晉間城壘
大抵多因山爲之觀西有忠烈廟卞壺廟也

以嵇紹乃壺二子眡盱配食紹死于惠帝時
在壺前且非江左事而以配壺非也廟後叢
木甚茂傳以爲壺墓墓東北又有亭頗疎豁
曰忠孝亭亭本南唐忠貞亭後避諱改焉忠
貞壺謚今日曰忠孝則并以其二子死父難也
雲堂道士陳德新字可久姑蘇人頗開敏相
從登覽久之遂出西門游清涼廣慧寺寺距
城里餘據石頭城下臨大江南直牛頭山氣

象甚雄然壞於兵火舊有德慶堂在法堂前
堂榜乃南唐後主撮襟書石刻尚存而堂徙
於西偏矣又有桀悟空禪師文曰保大九年
歲次辛亥九月皇帝以香茶乳藥之奠致祭
于右街清涼寺悟空禪師按南唐元宗以癸
卯歲嗣位改元保大當晉出帝之天福八年
至辛亥實保大九年當周太祖之廣順元年
則祭悟空者元宗也建康志以爲後主非是

入晉書 卷一
長老寶餘楚州人留食贈德慶堂榜墨本食
已同登石頭西望宣化渡及歷陽諸山真形
勝之地若異時定都建康則石當頭仍爲關
要或以爲今都城徙而南石頭雖守無益蓋
未之思也惟城旣南徙秦淮乃橫貫城中六
朝立柵斷航之類緩急不可復施然大江天
險都城臨之金湯之勢比六朝爲勝豈必依
淮爲固耶左迪功郎新湖州武康尉劉煒右

迪功郎監比較務李膺來煒秦伯和館客也
言秦氏衰落可念至屢典質生產亦薄問其
歲入幾何曰米十萬斛耳

八日晨至鍾山道林真覺大師塔焚香塔在太
平興國寺上寶公所塋也塔中金銅寶公像
有銘在其膺蓋王文公守金陵時所作僧言
古像取入東都啓聖院祖宗時每有祈禱啓
聖及此塔皆設道場考之信然塔西南有小

入蜀記 卷一
軒曰木末其下皆大松髯甲天矯如蛟龍往
往數百年物木末蓋後人取王文公詩木末
北山雲冉冉之句名之建康志謂公自命此
名非也塔後又有定林菴舊聞先君言李伯
時畫文公像於菴之昭文齋壁着帽束帶神
彩如生文公沒齋常扃閉遇重客至寺僧開
戶客忽見像皆驚聳覺生氣逼人寫照之妙
如此今菴經火尺椽無復存者予乙酉秋嘗

雨中獨來游留字壁間後人移刻崖石讀之
感歎蓋已五六年矣歸途過半山少留半山
者王文公舊宅所謂報寧禪院也自城中上
鍾山此爲中途故曰半山殘毀尤甚寺西有
土山今謂之培塿亦後人取文公詩所謂溝
西顧丁壯擔土爲培塿名之也寺後又有謝
安墩文公詩云在冶城西北卽此是也

九日至保寧戒壇二寺保寧有鳳凰臺攬輝亭

臺有李太白詩云三山半落青天外二水中
分白鷺洲今已廢爲大軍甲仗庫惟亭因舊
趾重築亦頗宏壯寺僧言亭榜本朱希真隸
書已爲俗子易之堂後有片石瑩潤如黑
玉乃宋子嵩詩題云鳳臺山亭子陳獻司空
鄉貢進士宋齊丘司空者徐知誥也後改姓
名曰李昇是爲南唐烈祖而齊丘爲大臣後
又有題字云昇元三年奉勅刻石蓋烈祖旣

有國追念君臣相遇之始而表顯之昇齊丘
雖皆不足道然當攘奪分裂橫潰之時其君
臣相遇不如是亦不能粗成其功業也戒壇
額曰崇勝戒壇寺古謂之瓦棺寺有閣因岡
阜其高十丈李太白所謂鍾山對北戶淮水
入南榮者又橫江詞一風三日吹倒山白浪
高於瓦棺閣是也南唐後主時朝廷遣武人
魏丕來使南唐意其不能文卽宴於是閣因

求賦詩丕攬筆成篇末句云莫教雷雨損基
扃後主君臣皆失色及南唐之亡爲吳越兵
所焚國朝承平二百年金陵爲大府寺觀競
以崇飾土木爲事然閣終不能復紹興中有
北僧來居講惟識百法論誓復興造求偉材
於江湖間事垂集者屢矣會建宮闕有司往
往輒取之僧不以此動心愈益經營卒成盧
舍那閣平地高七丈雄麗冠於江東舊閣基

相距無百步今廢爲軍營秦伯和遣醫柴安
恭來視家人瘡柴邢州龍岡人晚褚誠叔來
誠叔嘗爲福州閩清尉獲盜應格當得京官
不忍以人死爲已利辭不就至今在選調又
有爲它邑尉者亦獲盜營賞甚力卒得京官
將解去入郡過刑人處輒掩目大呼數日神
志方定後至他郡見通衢有石幢問此何爲
從者曰法場也亦大駭叫呼幾墜車自此所

至皆迂道以避刑人之地人之不可有媿于心如此移舟泊賞心亭下秦伯和送藥

十日早出建康城至石頭得便風張帆而行然

港淺而狹行亦甚緩宿大城岡金陵岡隴重

複如梅嶺岡石子岡余讀如婆岡尤其著者

也居民數十家亦有店肆

十一日早出夾行大江過三山磯烈洲慈姥磯

采石鎮泊太平州江口謝玄暉登三山還望

京邑李太白登三山望金陵皆有詩凡山臨

江皆曰磯水湍急篙工併力撐之乃能上然

今年閏餘秋早水落已數尺矣則盛夏可知

也三山自石頭及鳳凰臺望之杳杳有無中

耳及過其下則距金陵財五十餘里晉伐吳

王濬舟師過三山王渾要濬議事濬舉帆曰

風利不得泊卽此地也是日便風擊鼓掛帆

而行有兩大舟東下者阻風泊浦漵見之大

入聲訓 卷一
怒頓足詬罵不已舟人不答但撫掌大笑鳴
鼓愈厲作得意之狀江行淹速常也得風者
矜而阻風者怒可謂兩失之矣世事蓋多類
此者記之以寓一笑烈洲在江中上有小山
曰烈山草木極茂密有神祠在山巔慈姥矶
磯之尤巉絕峭立者徐師川有慈姥矶詩序
云矶與望夫石相望正可爲的對而詩人未
嘗掛齒牙故其詩云離鷺只說閨中恨舐犢

誰知目下情然梅聖俞護母喪歸宛陵發長
蘆江口詩云南國山川都不改傷心慈姥舊
時磯師川偶忘之耳聖俞又有過慈姥磯下
及慈姥山石崖上竹鞭詩皆極高奇與此山
稱采石一名牛渚與和州對岸江面比瓜洲
爲狹故隋韓擒虎平陳及本朝曹彬下南唐
皆自此渡然微風輒浪作不可行劉賓客云
蘆葦晚風起秋江鱗甲生王文公云一風微

入晉記 卷一
吹萬舟阻皆謂此磯也磯卽南唐樊若冰獻
策作浮梁渡王師處初若冰不得志于李氏
詐祝髮爲僧廬于采石山鑿石爲竅及建石
浮圖又月夜繫繩于浮圖棹小舟急渡引繩
至江北以度江面旣習知不謬卽亡走京師
上書其後王師南渡浮梁果不差尺寸予按
隋煬帝征遼蓋嘗用此策渡遼水造三浮橋
於西岸旣成引趨東岸橋短丈餘不合隋兵

赴水接戰高麗乘岸上擊之凌鐵杖戰死始
歛兵引橋復就西岸而更命何稠接橋二日
而成遂乘以濟然隋終不能平高麗國朝遂
下南唐者實天意也若冰何力之有方若冰
之北走也江南皆知其獻南征之策或請誅
其母妻李煜不敢但羈置池州而已其後若
冰自陳母妻在江南朝廷命煜護送煜雖憤
切終不敢違厚遺而遣之然若冰所鑿石竅

入蜀記 卷一
及石浮圖皆不毀王師卒用以繫浮梁則李氏君臣之暗且怠亦可知矣雖微若冰有不亡者乎張文潛作平江南議謂當縛若冰送李煜使甘心焉不然正其叛主之罪而誅之以示天下豈不偉哉文潛此說實天下正論也予自金陵得疾是日方小愈尚未能食夜雨

十二日早移舟泛姑熟溪五里泊閱武亭初詢

舟人云江口泊船處距城二十里須步乃可入及至閱武乃止在城圍之外徽猷閣直學士左朝請郎知州周元特操聞予病與醫郭師顯俱來視疾自都下相別迄今八年矣太平州本金陵之當塗縣周世宗時南唐元宗失淮南僑置和州于此謂之新和州改爲雄遠軍國朝開寶八年下江南改爲平南軍然獨領當塗一邑而已太平興國二年遂以爲

州且割蕪湖繁昌來屬而治當塗與興國軍
同時建置故分紀年以名之

十三日通判右朝請郎葉芬員外通判左朝奉
郎錢同仲耕軍事判官左文林郎趙子覲知
當塗縣右通直郎王權來午後入州見元特
呼郭醫就坐問爲予切脉且議所用藥州正
據姑熟溪北土人但謂之姑溪水色正綠而
澄澈如鏡織鱗往來可數溪南皆漁家景物

幽奇兩浮橋悉在城外其一通宣城其一可
至浙中姑熟堂最號得溪山之勝適有客寓
家其間故不得至又有一酒樓登望尤佳皆
城之南也往時溪流分一支貫城中湮塞已
久近歲嘗浚治然惟春夏之交暫通今七月
已絕流矣李太白集有姑熟十詠予族伯父
彥遠嘗言東坡自黃州還過當塗讀之撫手
大笑曰贗物敗矣豈有李白作此語者郭功

入蜀記 卷一
父爭以爲不然東坡又笑曰但恐是太白後
身所作耳功父甚愠蓋功父少時詩句俊逸
前輩或許之以爲太白後身功父亦遂以自
負故東坡因是戲之或曰十詠及歸來乎笑
矣乎僧伽歌懷素草書歌太白舊集本無之
宋次道再編時貪多務得之過也
十四日晚晴開南窻觀溪山溪中絕多魚時裂
水面躍出斜日映之有如銀刀垂釣挽罟者

彌望以故價甚賤僮使輩日皆饜飫土人云
此溪水肥宜魚及飲之水味果甘豈信以肥
故多魚耶溪東南數峰如黛蓋青山也

陳眉公訂正入蜀記卷之一 終

陳眉公訂正入蜀記卷之二

宋陸游務觀著

明沈麟禎虎丞同校
沈德先天生

十五日早州學教授左文林郎吳博古敏叔員
外教授左文林郎楊恂信伯來飯已游黃山
東嶽廟廣福寺遂登凌歊臺嶽廟棟宇頗盛
本謂之黃山大監廟大監者不知何神蓋淫

始參魚腹與東國林轉時有靈草山也
此刻水眼宜魚及鱗之水利果甘豈計以明
微過以姑罰其類對對輩日皆觀海上太元

祠也今既爲嶽廟而大監反寓食廡下廣福
本壽聖寺以紹興壬午詔書改額敗屋二十
餘間殘僧三四人蕭然如古驛主僧惠明溫
州平陽人凌歊臺正如鳳凰雨花之類特因
山巔名之宋高祖所營面勢虛曠高出氛埃
之表南望青山龍山九井諸峰如在几席龍
山卽孟嘉登高落帽處九井山有桓玄僭位
壇稍西江中二小山相對云東梁西梁也北

戶臨和州新城樓櫓歷二可辨蓋自絕江至
和州財十餘里李太白有黃山凌歊臺送族
弟泛舟赴華陰詩卽此地也臺後有一塔二
之後又有亭曰懷古云余初至當塗飲姑熟
溪水喜其甘滑已而徧飲城中水皆甘蓋泉
脉佳也

十六日郡集于道院歷游城上亭榭有坐歊亭
頗宜登覽城濠皆植荷花是夜月白如晝影

入溪中搖蕩如玉塔始知東坡玉塔臥微瀾
之句爲妙也

十七日郡集于青山李太白祠堂二教授同集
祠在青山之西北距山尚十五里墓在祠後
有小岡阜起伏蓋亦青山之別支也祠莫知
其始有唐劉全白所作墓碣及近歲張真甫
舍人所作重修祠碑太白烏巾白衣錦袍又
有道帽氅裘侑食于側者郭功甫也早飯罷

游青山二南小市有謝玄暉故宅基今爲湯
氏所居南望平野極目而環宅皆流泉奇石
青林文篠真佳處也遂由宅後登山路極險
巖凡三四里有兩道人持湯歡迎勞于松石
間又里許至一菴老道人出迎年七十餘姓
周濰州人居此山三十年顴頰如丹鬚鬢無
白者又有李媪八十矣耳目聰明談笑不衰
自言嘗得異人祕訣菴前有小池曰謝公池

水味甘冷雖盛夏不竭絕頂又有小亭亦名
謝公亭下視四山如蛟龍奔放爭赴川谷絕
類吾鄉舜山但舜山之巔豐沃夷曠無異平
陸此所不及也亭北望正對歷陽周生言元
顏亮入寇時戰鼓之聲震于山中云夜歸舟
次已一鼓盡矣坐間信伯言桓温墓亦在近
郊有石獸石馬製作精妙又有碑悉刻當時
車馬衣冠之類極可觀恨不一到也

十八日小雨解舟出姑熟溪行江中江溪相接
水清濁各不相亂挽行夾中三十里至大信
口泊舟蓋自此出大江須風便乃可行往往
連日阻風兩小山夾江卽東梁西梁一名天
門山李太白詩云兩岸青山相對出孤帆一
片日邊來王文公詩云崔嵬天門山江水遶
其下梅聖俞云東梁如仰蠶西梁如浮魚徐
師川云南人北人朝暮船東梁西梁今古山

入蜀記 卷二 四
皆得句於此也水滸小兒賣菱芡蓮藕者甚
衆夜行堤上觀月大信口歐陽文忠公于役
志謂之帶星口未詳孰是于役志蓋謫夷陵
時所著也

十九日便風過大小褐山磯奇石巉絕漁人依
石挽棹宛如畫圖間所見過臬磯在大江中
聳拔特起有道士結廬其上政和中賜名寧
淵觀舊說臬磯有臬能害人故得名方郡縣

奏乞觀額時惡其名因曰磯在水中水常沃
石故曰澆磯今觀屋亦二十餘間然止一道
人居之相傳有二人則其一輒死故無敢往
者至蕪湖縣泊舟吳波亭知縣右通直郎呂
昭問來按漢丹楊郡有蕪湖縣吳陸遜屯蕪
湖又杜預注春秋楚子伐吳克鳩茲亦云在
蕪湖至東晉乃改名于湖不知所自王敦反
屯于湖今故城尚存又有玩鞭亭亦當時遺

入蜀記 卷二 五
迹唐温飛卿有湖陰曲敘其事近時張文潛以爲晉書所云帝至于湖陰察營壘當以于湖爲句飛卿蓋誤讀也作于湖曲以反之劉夢得歷陽書事詩敘道中事云望夫人化石夢帝日環營蓋夢得自夔州移牧歷陽過此邑也邑人云數年前邑境有盜發大墓棺槨已壞得鏡及刀劍之屬甚衆甃博有大將軍墓四字或疑爲敦墓云

二十日寧國太平縣主簿左迪功郎陳炳來見泛小舟往謝之則寓寧淵觀下院以提刑司檄來督大禮錢帛寧淵在臬磯隔大江故置下院於近邑道流十餘壇宇像設甚盛有觀主何守誠者今選居太一宮矣炳字德先婺州義烏人自言其從姑得道徽宗朝賜號妙靜練師結廬葛仙峰下平生不火食惟飲酒啗生果爲人言禍福死生無毫釐差每風日

入蜀記 卷三
清和時輒掩關獨處或於戶外竊聽之但聞
若二嬰兒聲或歌或笑往往至中夜方止莫
有能測者年九十正旦自言四月八日當遠
行果以是日坐逝每爲德先言汝有仙骨當
遇異人後因得疾委頓有皖山徐先生來餌
以藥卽日疾平徐因留教以絕粒訣德先父
母方望其成名固不許然自是絕滋味日食
淡湯餅及飯而已如此者六年益覺身輕能

日行二百里會中第娶妻復近葷血徐遂告
別臨行語德先曰汝二紀後當復從我究此
事德先送至溪上方呼舟欲渡徐褰裳疾行
水上而去呼之不復應德先至今悵悵有棄
官入瀟皖之意予遂游東寺登王敦城以歸
城並大江氣象宏敞邑出綠毛龜就船賣者
不可勝數將午解舟過三山磯磯上新作龍
祠有道人半醉立蘚崖峭絕處下觀行舟望

之使人寒心亦奇士也江中江豚十數出沒
色或黑或黃俄又有物長數尺色正赤類大
蜈蚣奮首逆水而上激水高三二尺殊可畏
也宿過道口

二十一日過繁昌縣南唐所置初隸宣城及置
太平州復割隸焉晚泊荻港散步堤上游龍
廟有老道人守之台州仙居縣人自言居此
十年日伐薪二束賣之以自給雨雪則從人

乞未嘗他營也又至一菴僧言隔港卽銅陵
界遠山嶄然臨大江者卽銅官山太白所謂
我愛銅官樂千年未擬還是也恨不一到最
後至鳳凰山延禧觀觀廢于兵燼者四十餘
年近方興葺羽流五六人觀主陳廷瑞婺州
義烏縣人言此古青華觀也有趙先生荻港
市中人父賣茗先生幻名王九年十三疾亟
父抱詣青華願使入道是夕先生夢老人引

之登高山謂曰我陰翁也出栢枝啗之及覺
遂不火食後又夢前老人教以天篆數百字
比覺悉記不遺太宗皇帝召見度爲道士賜
冠簡易名自然給裝錢遣還遂爲觀主祥符
間再召至京師賜紫衣改青華額曰延禧先
生懇求還山養母得歸一日無疾而逝門人
葬之山中行半途棺忽大重不可舉其母曰
吾兒必有異命發棺果空無尸惟劒履在耳

遂卽其處葬之今冢猶在謂之劒冢自然國
史有傳大槩與廷瑞言頗合惟劒冢一事無
之荻港蓋繁昌小墟市也歸舟已夜矣

二十二日過大江入丁家洲夾復行大江自離
當塗風日清美波平如席白雲青嶂遠相映
帶終日如行圖畫殊忘道途之勞也過銅陵
縣不入晚泊水洪口江湖間謂分流處爲洪
王文公詩云東江木落水分洪是也

入蜀記 卷二
九
二十三日過陽山磯始見九華山九華本名九
子李太白爲易名太白與劉夢得皆有詩而
劉至以爲可兼太華女几之奇秀南唐宋子
嵩辭政柄歸隱此山號九華先生封青陽公
由是九華之名益盛惟王文公詩云盤根雖
巨壯其末乃修纖最極形容之妙大抵此山
之奇在脩纖耳然無含蓄敦大氣象與廬山
天台異矣岸旁荻花如雪舊見天井長老彥

威云廬山老僧用此絮紙衣威少時在惠日
亦爲之佛燈珣禪師見而大嗔云汝少年輒
求溫暖如此豈有心學道耶退而問兄弟則
堂中百人有荻花衣者財三四皆年七十餘
矣威愧恐亟除去泊梅根港巨魚十數色蒼
白大如黃犢出沒水中每出水輒激起沸白
成浪真壯觀也

二十四日到池州泊稅務亭子州唐置南唐嘗

爲康化軍節度今省又嘗割青陽隸建康今
復故惟所置銅陵東流二縣及改秋浦爲貴
池今因之蓋南唐都金陵故當塗蕪湖銅陵
繁昌廣德青陽并江寧上元溧陽溧水句容
凡十一縣皆隸畿內今建康爲行都而纔有
江寧等五邑有司所當議也李太白往來江
東此州所賦尤多如秋浦歌十七首及九華
山清溪白筇陂玉鏡潭諸詩是也秋浦歌云

秋浦長似秋蕭條使人愁又曰兩鬢入秋浦
一朝颯已衰援聲催白鬢長短盡成絲則池
州之風物可見矣然觀太白此歌高妙乃爾
則知姑熟十詠決爲贗作也杜牧之池州諸
詩正爾觀之亦清婉可愛若與太白詩並讀
醇醜異味矣初王師平南唐命曹彬分兵自
荊州順流東下以樊若冰爲鄉導首克池州
然後能取蕪湖當塗駐軍采石而浮橋成則

池州今實要地不可不備也

二十五日見知州右朝議大夫直祕閣楊師中
通判右朝奉郎孫德芻游光孝寺寺有西峰
聖者所留鐵笛聖者生當吳武王楊行密時
陽狂不羈好吹笛能役鬼神蛟龍嘗寓池州
乾明寺乾明卽光孝也及去留笛付主事僧
笛似銅鐵而非色綠而瑩潤如綠玉不知何
物僧懼爲好事者所奪郡官求觀之輒出一

凡鐵笛充數予偶與監寺僧有舊獨得一見
有石刻沈啟達所作西峰銘文辭古雅可愛
恨非其自書也僧言貴池去城八十里在秀
山下江之一支別匯爲池四隅皆因山石爲
岸產鯉魚金鱗朱尾味極美本以此得貴池
之目秀山有梁昭明太子墓拱木森然今池
州城西有神甚靈者曰九郎或云九郎卽昭
明晚登弄水亭杜牧之所賦詩也亭殊不葺

然正對清溪齊山景物絕佳州雖瀕江然據岡阜上頗難得水

二十六日解舟過長風沙羅刹石李太白江上贈竇長史詩云萬里南遷夜郎國三年歸及長風沙梅聖俞送方進士遊廬山云長風沙浪屋許大羅刹石齒水下排歷此二險過湓浦始見瀑布懸蒼崖卽此地也又太白長干行云早晚上三巴預將書報家相迎不道遠

直到長風沙蓋自金陵至此七百里而室家來迎其夫甚言其遠也地屬舒州舊最號湍險仁廟時發運使周湛役三十萬夫疏支流十里以避之至今爲行舟之利羅刹石在大江中正如京口鵲峰而稍大白石拱起其上叢篠喬木亦有小神祠旛竿不知何神也西望羣山靡迤巖嶂深秀宛如吾廬南望鏡中諸山爲之累欹宿懷家狀懷姓也吳有尚書

入蜀詩 卷二 郎懷敘見顧雍傳

二十七日五鼓大風自東北來舟人不告乘便
風解船過鴈翅夾有稅場居民二百許家岸
下泊船甚衆遂經皖口至趙屯未朝食已行
百五十里而風益大乃泊夾中皖口卽王師
破江南大將朱令贇水軍處趙屯有戍兵亦
小市聚也是日大風至暮不止登岸行至夾
口觀江中驚濤駭浪雖錢塘八月之潮不過

也有一舟掀簸浪中欲入夾者再三不可得
幾覆溺矣號呼救久方能入北望望正見皖
山太白江上望皖公山詩云巉絕稱人意巉
絕二字不刊之妙也南唐元宗南遷豫章舟
中望皖山愛之謂左右曰此青峭數峰何名
答曰舒州皖山時方新失淮南伶人李家明
侍側獻詩曰龍舟千里颺東風漢武潯陽事
正同回首皖公山色好日斜不到壽杯中元

入蜀記 卷二
宗爲悲憤歎歎故王文公詩云南狩皖山非
故地北師淮水失名王計其處當去此不遠
也夜雨

二十八日過東流縣不入自雷江口行大江江
南羣山蒼翠萬疊如列屏障凡數十里不絕
自金陵以西所未有也是日便風張帆舟行
甚速然江面浩渺白浪如山所乘二千斛舟
搖兀掀舞纔如一葉過獅子磯一名佛指磯

蘇壁百尺青林綠篠倒生壁 圖画有所不
及猶恨舟行北岸不得過其下旁有數磯亦
奇峭然皆非獅子比也至馬當所謂下元水
府山勢尤秀拔正面山脚直插大江廟依峭
崖架空爲閣登降者皆自閣西崖腹小石徑
捫蘿側足而上宛若登梯飛甍曲檻丹碧縹
緗江上禱祠惟此最佳舟至石壁下忽晝晦
風勢橫甚舟人大恐失色急下帆趨小港竭

力牽挽僅能入港繫纜同泊者四五舟皆來助牽早間同行一舟亦蜀舟也忽有大魚正綠腹下赤如丹躍起拖旁高三尺許人皆異之是晚果折樯破帆幾不能全亦可怪也入夜風愈厲增十餘纜迨曉方少定

二十九日阻風馬當港中風雨淒冷初御袂衣有小舟冒風濤來賣薪菜豕肉亦有賣野彘肉者云獵蘆場中所得飯已登南岸望馬當

廟北風吹人勁甚至不能語既暮風少定然怒濤未息擊船終夜有聲

八月一日過烽火磯南朝自武昌至京口列置烽燧此山當是其一也自舟中望山突兀而已及拋江過其下嵌巖竇穴怪奇萬狀色澤瑩潤亦與它石迥異又有一石不附山傑然特起高百餘尺丹藤翠蔓羅絡其上如寶裝屏風是日風靜舟行頗遲又秋深潦縮故得

盡見杜老所謂幸有舟楫遲得盡所歷妙也
過澎浪磯小孤山二山東西相望小孤屬舒
州宿松縣有戍兵凡江中獨山如金山焦山
落星之類皆名天下然峭拔秀麗皆不可與
小孤比自數十里外望之碧峰巉然孤起上
干雲霄已非它山可擬愈近愈秀冬夏晴雨
姿態萬變信造化之尤物也但祠宇極於荒
殘若稍飾以樓觀亭榭與江山相發揮自當

高出金山之上矣廟在山之西麓額曰惠濟
神曰安濟夫人紹興初張魏公自湖湘還嘗
加營葺有碑載其事又有別祠在澎浪磯屬
江州彭澤縣三面臨江倒影水中亦占一山
之勝舟過磯雖無風亦浪湧蓋以此得名也
昔人詩有舟中估客莫漫狂小姑前年嫁彭
郎之句傳者因謂小孤廟有彭郎像澎浪廟
有小姑像實不然也晚泊沙夾距小孤一里

微雨復以小艇游廟中南望彭澤都昌諸山
烟雨空濛鷗鷺滅沒極登臨之勝徙倚久之
而歸方立廟門有俊鶻搏水禽掠江東南去
甚可壯也廟祝云山有栖鶻甚多

二日早行未二十里忽風雲騰湧急繫纜俄復
開霽遂行泛彭蠡口四望無際乃知太白開
帆入天鏡之句為妙始見廬山及大孤大孤
狀類西梁雖不可擬小孤之秀麗然小孤之

旁頗有沙洲葭葦大孤則四際渺瀰皆大江
望之如浮水面亦一奇也江自湖口分一支
為南江蓋江西路也江水渾濁每汲用皆以
杏仁澄之過夕乃可飲南江則極清澈合處
如引繩不相亂晚抵江州州治德化縣卽唐
之潯陽縣柴桑栗里皆其地也南唐為奉化
軍節度今為定江軍岸土赤而壁立東坡先
生所謂舟人指點岸如頰者也泊湓浦水亦

入蜀記 卷二
甚清不與江水亂自七月二十六日至是首
尾財六日其間一日阻風不行實以四日半
泝流行七百里云

三日移泊琵琶亭見知州左朝請郎周昇強仲
通判左朝散郎胡适發運使戶部侍郎史正
志志道發運司幹辦公事程坦履道察推左
文林郎蔡戡定夫如得夔州公移

四日游天慶觀李太白詩所謂潯陽紫極宮也

蘇黃詩刻皆不復存太白詩有一石亦近時
俗書見觀主李守智問玉芝亦不能答觀皆
古屋初不更兵燼而遺迹掃地獨太清殿老
君像乃唐人所塑特為奇古真人女真仙官
力士童子各二軀又有唐明皇帝金銅像衣
冠如道士而氣宇粹穆有五十年安享太平
富貴氣象李守智者滁州來安人自言家故
富饒遇亂棄家為道人大將岳飛以度牒與

之始爲道士至今畫岳氏父子事之史志道
招飲於發運廨中登高遠亭望廬山天氣澄
霽諸峰盡見志道出新鼓鑄鐵錢
五日郡集於庾樓樓正對廬山之雙劍峰北臨
大江氣象雄麗自京口以西登覽之地多矣
無出庾樓右者樓不甚高而覺江山烟雲皆
在几席間真絕景也庾亮嘗爲江荊豫州刺
史其實則治武昌若武昌南樓名庾樓猶有

理今江州治所在晉特柴桑縣之湓口關耳
此樓附會甚明然白樂天詩固已云潯陽欲
到思無窮庾亮樓南湓口東則承誤亦久矣
張芸叟南遷錄云庾亮鎮潯陽經始此樓其
誤尤甚

六日甲夜有大燈毬數百自湓浦蔽江而下至
江面廣處分散漸遠赫然如繁星麗天土人
云此乃一家放五百椀以禳災祈福蓋江鄉

舊俗云

七日往廬山小憩新橋市蓋吳蜀大路市肆壁
間多蜀人題名並溪喬木往往皆三二百年
物蓋山之麓也自江州至太平興國宮三十
里此適當其半是日車馬及徒行者憧憧不
絕云上觀蓋往太平宮焚香自八月一日至
七日乃已謂之白蓮會蓮社本遠法師遺迹
舊傳遠公嘗以一日借道流故至今太平宮

歲以爲常東林寺亦自作會然來者反不若
太平之盛亦可笑也晚至清虛菴菴在撥雲
峰下皇甫道人所居皇甫名坦嘉州人出游
旁郡獨見其弟子曹彌深登紹興煥文閣實
藏光堯皇帝御書又有神泉清虛堂皆宸翰
題榜宿清虛西室曹君置酒堂中炙鹿肉甚
珍酒尤清醇夜寒可附火

八日早由山路至太平興國宮門庭氣象極閑

壯正殿爲九天採訪使者像袞冕如帝者舒
州瀟山靈仙觀祀九天司命真君而採訪使
者爲之佐故南唐名靈仙曰丹霞府太平曰
通玄府崇奉有自來矣至太宗皇帝時嘗遣
中使送泥金絳羅雲鶴帔仍命三年一易神
宗皇帝時又加封應元保運真君及賜塗金
殿額兩壁圖十真人本吳生筆建炎中李成
何世清二盜以廬山爲巢宮屋焚蕩無餘先

是山中有太一宮摹吳筆於殿廡及太平再
興復摹取太一本所託非善工無復髣髴
於雲無心堂蓋冷翠亭故趾也溪聲如大風
雨至使人毛骨寒慄一宮之最勝處也採訪
殿前有鐘樓高十許丈三層累磚所成不用
一木而欄桷翬飛雖木工之良者不能加也
但鐘爲塼所揜蔽聲不甚揚亦是一病觀主
胡思齊云此一樓爲費三萬緡鐘重二萬四

千餘斤又有經藏亦佳扁曰雲章瓊室太平
規模大槩類南昌之玉隆然玉隆不經焚尚
有古趣爲勝也遂至東林太平興龍寺寺正
對香爐峰峰分一支東行自北而西環合四
抱有如城郭東林在其中相地者謂之倒掛
龍格寺門外虎溪本小澗比年甃以磚但若
一溝無復古趣予勸其主僧法才去塼使少
近自然不知能用吾言否食已煮觀音泉啜

茶登華嚴羅漢閣閣與盧舍閣鐘樓鼎峙皆
極天下之壯麗雖閩浙名藍所不能逮遂至
上方五杉閣舍利塔白公草堂上方者自寺
後支徑穿松陰躡石磴而上亦不甚高五杉
閣前舊有老杉五本傳以爲晉時物白傳所
謂大十尺圍者今又數百年其老可知矣近
歲主僧了然輒伐去殊可惜也塔中作如來
示寂像本宋佛馱跋陀尊者自西域持舍利

五粒來葬于此草堂以白公記考之略是故處三間兩注亦如記所云其它如瀑水蓮池亦皆在高風逸韻尚可想見白公嘗以文集留草堂後屢亡逸真宗皇帝嘗令崇文院寫校包以班竹帙送寺建炎中又壞於兵今獨有姑蘇版本一帙備故事耳草堂之旁又有一故趾云是王子醇樞密庵基蓋東林為禪苑始於王公而照覺禪師常總實第一祖總

公有塑像嚴重英特人也宿東林

九日至晉慧遠法師祠堂及神運殿焚香憩官廳堂中有耶舍尊者劉遺民等十八人像謂之十八賢遠公之側又有一人執軍持侍立謂之辟蛇童子傳云東林故多蛇此童子盡拾取投之蘄州神運殿本龍潭深不可測一夕鬼神塞之且運良材以作此殿皆不知實否也然神運殿三字唐相裴休書則此說亦

入蜀記 卷二
久矣官廳重堂邃廡厨廡備設壁間有張文
潛題詩寺極大連日游歷猶不能徧唐碑亦
甚多惟顏魯公題名最爲時所傳又有聰明
泉在方丈之西卓錫泉在遠公祠堂後皆久
廢不汲不可食爲之太息食已游西林乾明
寺西林在東林之西二林之間有小市曰鴈
門市傳者以爲遠公鴈門人老而懷故鄉遂
髣髴鴈門邑里作此市漢作新豐之比也西

林本晉江州刺史陶範捨地建寺紹興十五
六年間方爲禪居褊小非東林比又絕弊壞
主僧仁聰閩人方漸興茸然流泉泠泠環遶
庭際殊有野趣正殿釋迦像着寶冠他處未
見僧云唐塑也殿側有慧永法師祠堂永公
蓋遠公之兄像下一虎偃伏又有一居士立
侍不知何人方丈後有塼塔不甚高制度古
朴予登二級而止東廂有小閣曰待賢蓋往

入蜀記 卷二
時館客之地今亦頽弊東西林寺舊額皆牛
奇章八分書筆力極渾厚西林亦有顏魯公
題名書家以爲二林題名顏書之冠冕也舊
聞廬山天池塼塔初成有僧施經二匣未幾
塔震一角經亦失所在是日因登望以問僧
僧云誠然或謂經乃刺血書故致此異又云
今年天池火尺椽不遺蓋旁野火所及也晚
復取太平宮路還江州小憩于新亭距州二

十五里過董真人煉丹井汲飲味亦佳董真
人者奉也

十日史志道餉谷簾水數器真絕品也甘腴清
冷具備衆美前輩或斥水产品以爲不可信水
品固不必盡當然谷簾卓然非惠山所及則
亦不可誣也水在廬山景德觀晚別諸人連
夕在山中極寒可擁爐比還舟秋暑殊未又
終日揮扇

入蜀記 卷二
十一日解舟吳發幹約待夔州書因小留江口
望廬山自到江州至是凡十日皆晴秋高氣
清長空無纖雲甚宜登覽亦客中可喜事也
泊赤沙湖口東北望猶見廬山老杜潭州道
林詩云殿脚插入赤沙湖此湖當在湖南然
岳州華容縣及此皆有赤沙湖蓋江湖間地
名多同猶赤壁也

十二日江中見物有雙角_注望正如小犢出沒
水中有聲晚泊艫臍狀隔江大山中有火兩
點若鐙開闔久之問舟人皆不能知或云蛟
龍之目或云靈芝丹藥光氣不可得而詳也
十三日至富池昭勇廟以壺酒特豕謁昭毅武
惠遺愛靈顯王神神吳大帝時折衝將軍甘
興霸也興霸嘗為西陵太守故廟食于此開
寶中旣平江南增江淮神祠封爵始封襄國
公宣和中進爵為王建炎中大盜張遇號一

入蜀記 卷二
窩蜂擁兵過廟下相率卜玟一玟騰空中不
下一玟躍出戶外羣盜惶恐引去未幾遂敗
大將劉光世以聞後詔加封岳飛爲宣撫使
大葺祠宇江上神祠皆不及也門起大樓曰
卷雪有釘洲正對廟故廟雖俯大江而可泊
舟釘洲者以銳下得名神妃封順祐夫人神
二子封紹威紹靈侯神女封柔懿夫人皆有
像而後殿復有王與妃像偶坐祭享之盛以

夜繼日廟祝歲輸官錢千二百緡則神之靈
可知也舟人云若精虔致禱則神能分風以
應往來之舟庶下有關雲長像雲長不應祀
於興霸之廟者豈各忠所事神靈共食皆可
以無媿耶徹奠自祠後步至旌教寺寺爲酒
務及酒官廨像設歛置一屋盡逐去僧輩亦
事之已甚者富池蓋隸興國軍

十四日曉雨過一小石山自頂直削去半與餘

姚江濱之蜀山絕相類拋大江遇一木杙廣
十餘丈長五十餘丈上有三四十家妻子雞
犬白碓皆具中爲阡陌相往來亦有神祠素
所未覩也舟人云此尚其小者耳大者於杙
上鋪土作蔬圃或作酒肆皆不復能入夾但
行大江而已是日逆風挽船自平旦至日昃
纔行十五六里泊劉官磯旁蘄州界也兒輩
登岸歸云得小徑至山後有陂湖渺然蓮芰

甚富沿湖多木芙蓉數家夕陽中蘆蒲茅舍
宛有幽致而寂然無人聲有大梨欲買之不
可得湖中小艇采菱呼之亦不應更欲窮之
會見道旁設機疑有虎狼遂不敢往劉官磯
者傳云漢昭烈人吳嘗檣舟于此晚觀大鼉
浮沉水中

十五日微陰西風益勁挽船尤艱自富池以西
沿江之南皆大山起伏如濤頭山麓時有居

入蜀記 卷二
民往往作棚持弓矢伏其上以伺虎過龍眼
磯江中拳石耳磯旁山上有龍祠晡後得便
風次蘄口鎮居民繁錯蜀舟泊岸下甚衆監
稅秉義郎高世棟來舊在京口識之言此鎮
歲課十五萬緡鴈翅歲課二十六萬緡夜與
諸子登岸臨大江觀月江面遠與天接月影
入水蕩搖不定正如金虬動心駭目之觀也
是日買熟藥於蘄口市藥貼中皆有煎煮所
須如薄荷烏梅之類此等皆客中不可倉卒
求者藥肆用心如此亦可嘉也

陳眉公訂正入蜀記卷之二

終

陳眉公訂正入蜀記卷之三

朱青瑛詩用少收此亦何異也
於此詩詩意殊之賤此等詩客中不可食平

陳眉公訂正入蜀記卷之三

宋陸游務觀著

明沈麟禎虎丞同校
沈德先天

十六日過新野夾有石瀨茂林始聞秋鶯沙際
水牛至多往往數十為羣吳中所無也地屬
興國軍大治縣當是上產所宜爾晚過道士
磯石壁數百尺色正青了無竅穴而竹樹迸

根交絡其上蒼翠可愛自過小孤臨江峯嶂
無出其右磯一名西塞山卽玄真子漁父辭
所謂西塞山前白鷺飛者李太白送弟之江
東云西塞當中路南風欲進船必在荆楚作
古有中路之句張文潛云危磯插江生石色
擘青玉殆爲此山寫真又云已逢斌媚散花
峽不泊艱危道士磯蓋江行惟馬當及西塞
最爲湍險難上拋江泊散花洲洲與西塞相

直前一夕月猶未極圓蓋望正在是夕空江
萬頃丹如紫金盤自水中涌出平生無此中
秋也

十七日過回風磯無大山蓋江濱石磧耳然水
急浪湧舟過甚艱過蘭溪東坡先生所謂山
下蘭芽短浸谿者買鹿肉供膳晚泊巴河口
距黃州二十里一市聚也有馬祈寺吳大帝
刑馬壇傳云吳攻壽春刑白馬祭江神於此

自蘭谿而西江面尤廣山阜平遠兩日皆逆
風舟人以食盡欲來巴河糴米極力牽挽日
皆行八九十里蘇黃門謫高安東坡先生送
至巴河卽此地也張文潛亦有巴河道中詩
云東南地缺天運水春夏風高浪卷山
十八日食時方行晡時至黃州州最僻陋少事
杜牧之所謂平生睡足處雲夢澤南州然自
牧之王元之出守又東坡先生張文潛謫居

遂爲名邦泊臨臯亭東坡先生所嘗寓與秦
少游書所謂門外數步卽大江是也煙波渺
然氣象疎豁見知州右朝奉郎直祕閣楊由
義通判右奉議郎陳紹復州治陋甚廳事僅
可容數客倅居差勝晚移舟竹園步蓋臨臯
多風濤不可夜泊也黃州與樊口正相對東
坡所謂武昌樊口幽絕處也漢昭烈用吳魯
子敬策自當陽進任鄂縣之樊口卽此地也

十九日早游東坡自州門而東岡壟高下至東坡則地勢平曠開豁東起一壟頗高有屋三間一龜頭曰居士亭亭下面南一堂頗雄四壁皆畫雪堂中有蘇公像烏帽紫裘橫按筇杖是爲雪堂堂東大柳傳以爲公手植正南有橋榜曰小橋以莫忘小橋流水之句得名其下初無渠澗遇雨則有涓流耳舊止片石布其上近輒增廣爲木橋覆以一屋頗敗人

意東一井曰暗井取蘇公詩中走報暗井出之句泉寒熨齒但不甚甘又有四望亭正與雪堂相直在高阜上覽觀江山爲一郡之最亭名見蘇公及張文潛集中坡西竹林古氏故物號南坡今已殘伐無幾地亦不在古氏矣出城五里至安國寺亦蘇公所嘗寓兵火之餘無復遺迹惟遶寺茂林啼鳥似猶有當時氣象也郡集於棲霞樓本太守閻丘孝終

公顯所作蘇公樂府云小舟橫截春江臥看
翠壁紅樓起正謂此樓也下臨大江煙樹微
茫遠山數點亦佳處也樓頗華潔先是郡有
慶瑞堂謂一故相所生之地後毀以新此樓
酒味殊惡蘇公齋湯蜜汁之戲不虛發郡人
何斯舉詩亦云終年飲惡酒誰敢憎督郵然
文潛乃極和黃州酒以爲自京師之外無過
者故其詩云我初謫官時帝問司酒神曰此

好飲徒聊給酒養真去國一千里齊安酒最
醇失火而得雨仰戴天公仁豈文潛謫黃時
適有佳匠乎循小徑繚州宅之後至竹樓規
模甚陋不知當王元之時亦止此耶樓下稍
東卽赤壁磯亦茅岡爾略無艸木故韓子蒼
待制詩云豈有危巢與栖鶻亦無陳迹但飛
鷗此磯圖經及傳者皆以爲周公瑾敗曹操
之地然江上多此名不可考質李太白赤壁

入蜀記 卷三
歌云烈火張天照雲海周瑜於此敗曹公不
指言在黃州蘇公尤疑之賦云此非曹孟德
之困於周郎者乎樂府云故壘西邊人道是
當日周郎赤壁蓋一字不輕下如此至韓子
蒼云此地能令阿瞞走則真指爲公瑾之赤
壁矣又黃人實謂赤壁曰赤鼻尤可疑也晚
復移舟菜園步又遠竹園三四里蓋黃州臨
大江了無港澳可泊或云舊有澳郡官厭過

容故塞之

二十日曉離黃州江平無風挽船正自赤壁磯
下過多奇石五色錯雜粲然可愛東坡先生
怪石供是也挽行十四五里江面始稍狹隔
江岡阜延袤竹樹葱蒨漁家相映幽邃可愛
復出大江過三江口極望無際泊戚磯港
二十一日過雙柳夾回望江上遠山重複深秀
自離黃雖行夾中亦皆曠遠地形漸高多種

菽粟蕎陵之屬晚泊楊羅汭大隄高柳居氏
稠衆魚賤如土百錢可飽二十口又皆巨魚
欲覓小魚飼猫不可得

二十二日平旦微雨過青山磯多碎石及淺灘
晚泊白楊夾口距鄂州三十里陸行止十餘
里居民及泊舟甚多然大抵皆軍人也

二十三日便風掛帆自十四日至是始得風食
時至鄂州泊稅務亭賈船客舫不可勝計街

尾不絕者數里自京口以西皆不及李太白
贈江夏韋太守詩云萬舸此中來連帆過楊
州蓋此郡自唐爲衝要之地夔州逐兵來參
見知州右朝奉郎張郊之彥轉運判官右朝
奉大夫謝師稷市邑雄富列肆繁錯城外南
市亦數里雖錢塘建康不能過隱然一大都
會也吳所都武昌乃今武昌縣此州在吳名
夏口亦要害故周公瑾求以精兵進住夏口

而晉武帝亦詔王濬唐彬既定巴丘與胡奮
王戎共平夏口武昌順流長騫也自江州至
此七百里泝流雖日得便風亦須三四日韓
文公云益城去鄂渚風便一日耳過矣蓋退
之未嘗行此路也

二十四日早謝漕招食於漕園光華堂依山亭
館十餘不甚葺晚郡集於奇章堂以唐牛思
黯嘗爲武昌節度使也

二十五日觀大軍教習水戰大艦七百艘皆長
二三十丈上設城壁樓櫓旗幟精明金鼓鞀
鞞破巨浪往來捷如飛翔觀者數萬人實天
下之壯觀也

二十六日與統紆同遊頭陀寺寺在州城之東
隅石城山山繚繞如伏蛇自西亘東因其上
爲城缺壞僅存州治及漕司皆依此山寺毀
於兵火汴僧舜廣任持三十年興葺略備自

方丈西北躡支徑至絕頂舊有奇章亭今已廢四顧江山井邑靡有遺者李太白江夏贈韋南陵詩云頭陀雲外多僧氣正謂此寺也黃魯直亦云頭陀全盛時宮殿梯空級藏殿後有南齊王簡棲碑唐開元六年建蘇州刺史張庭圭溫玉書韓熙載撰碑陰徐錯題額最後云唐歲在己巳武昌軍節度觀察留後在軍州事揚州忠重立前鄂州唐年縣王簿

祕書省正字韓夔書碑陰云乃命猶子夔正其舊本而刊寫之以是知夔爲熙載兄弟之子也碑字前後一手又作溫字不全蓋南唐尊徐溫爲義祖而避其名則此碑蓋夔重書也碑陰又云皇上鼎新文物教被華夷如來妙旨悉已徧窮百代文章罔不備舉故是寺之碑不言而興按此碑立於己巳歲當皇朝之開寶二年南唐危蹙日甚距其亡六年爾

熙載大臣不以覆亡爲懼方且言其主鼎新
文物教被華夷固已可怪又以窮佛旨舉遺
文及興是碑爲盛誇誕妄謬真可爲後世發
笑然熙載死李主猶恨不及相之君臣之惑
如此雖欲久存得乎唐制節度使不在鎮而
以副大使或留後居任則云知節度事此云
知軍州事蓋漸變也唐年縣本故唐時名梁
改曰臨夏後唐復晉又改臨江然歷五代鄂

州未嘗屬中原皆遷改耳故此碑開寶中建
而猶曰唐年也至江南平始改崇陽云簡棲
爲此碑駢儷卑弱初無過人世徒以載於文
選故貴之耳自漢魏之間駸駸爲此體極於
齊梁而唐尤貴之天下一律至韓吏部柳柳
州大變文格學者翕然慕從然駢儷之作終
亦不衰故熙載錯號江左辭宗而拳拳於簡
棲之碑如此本朝楊劉之文擅天下傳夷狄

亦駢儷也及歐陽公起然後掃蕩無餘後進之士雖有工拙要皆近古如此碑者今人讀不能終篇已坐睡矣而况効之乎則歐陽氏之功可謂大矣若曾直云唯有簡棲碑文章巋然立蓋戲也

二十七日郡集於南樓在儀門之南石城上一曰黃鶴山制度闕偉登望尤勝鄂州樓觀爲多而此獨得江山之要會山谷所謂江東湖

北行畫圖鄂州南樓天下無是也下闕南湖荷葉彌望中爲橋曰廣平其上皆列肆兩旁有水閣極佳但以賣酒不可往山谷云凭欄十里芰荷香渭南湖也是日早微雨晚晴二十八日同章冠之秀才甫登石鏡亭訪黃鶴樓故址石鏡亭者石城山一隅正枕大江其西與漢陽相對止隔一水人物艸木可數唐沔州治漢陽縣故李太白沔州泛城南郎官

入蜀記 卷三 十一
湖詩序云白遷於夜郎遇故人尚書郎張謂
出使夏口沔州牧杜公漢陽令王公觴于江
城之南湖其後沔州廢漢陽以縣隸鄂州周
世宗平淮南得其地復以爲軍太白詩云誰
道此水廣狹如一疋練江夏黃鶴樓青山漢
陽縣大語猶可聞故人難可見形容最妙黃
魯直宵征江夏縣睡起漢陽城亦此意老杜
有公安送李晉肅入蜀余下沔鄂及登舟將

適漢陽詩而卒於耒水可恨也漢陽負山帶
江其南小山有僧寺者大別山也又有小別
謂之二別云黃鶴樓舊傳費禕飛升於此後
忽乘黃鶴來歸故以名樓號爲天下絕景崔
灝詩最傳而太白奇句得於此者尤多今樓
已廢故趾亦不復存問老吏云在石鏡亭南
樓之間正對鸚鵡洲猶可想見其地樓榜李
監篆石刻獨存太白登此樓送孟浩然詩云

孤帆遠映碧山盡惟見長江天際流蓋帆檣
映遠山尤可觀非江行久不能知也復與冠
之出漢陽門遊仙洞止是石壁數尺皆直裂
無洞穴之狀舊傳有仙人隱其中嘗啓洞出
游老兵遇之得黃金數餅後化爲石東坡先
生有詩紀其事初不去所遇何人且太白固
已云頗聞列仙人於此學飛術一朝向蓬海
千載空石室今鄂人謂之呂公洞蓋流俗附

會也有道人澶州人結廬洞側設呂公像其
中洞少南卽石鏡山麓麤頑石也色黃赤皴
駁了不能鑑物可謂浪得名者由江濱堤上
還船民居市肆數里不絕其間復有巷陌往
來憧憧如織蓋四方商賈所集而蜀人爲多
二十九日早有廣漢僧世全左縣僧了證來附
從人舟日昃移舟江口回望堤上樓閣重複
燈火歌呼夜分乃已招醫趙隨爲靈照視脉

入蜀言 卷三 十三
三十日黎明離鄂州便風掛帆沿鵲洲南行
洲上有茂林神祠遠望如小山洲蓋禰正平
被殺處故太白詩云至今芳洲上蘭蕙不敢
生梁王僧辯擊邵陵王綸軍至鸚鵡洲卽此
地也自此以南爲漢水禹貢所謂嶓冢導漾
東流爲漢者水色澄澈可鑑太白云楚水清
若空蓋言此也過謝家磯金雞洲磯不甚高
而石皆橫裂如累層甍得縮項鱸魚重十斤

泝中有聚落如小縣出鱖魚居民率以賣詐
爲業晚泊通濟口自此入沌沌讀如篆字書
云水名在江夏過九月則沌涸不可行必由
巴陵至荆渚

九月一日始入沌實江中小夾也過新潭有龍
祠甚華潔自是遂無復居人兩岸皆葭葦禰
望詞之百里荒又無挽路舟人以小舟引百
丈入夜財行四十五里泊叢葦中平時行舟

入黃言 卷三 四
多於此遇盜通濟巡檢持兵來警邏不寐達旦

旦
二日東岸葦稍薄缺時見大江渺瀰蓋巴陵路也晡時次下郡始有二十餘家皆業漁釣蘆藩茅屋宛有幽致魚尤不論錢自此始復有挽路登舟皆望竟陵遠山泊白白有莊居數家門外皆古柳侵雲

三日自入沌食無菜是日始得菘及蘆服然不肯斲根皆刈葉而已過八疊汊口皆有民居晚泊歸子保亦有十餘家多桑柘榆柳

四日平旦始解舟舟人云自此陂澤深阻虎狼出沒未明而行則挽卒多爲所害是日早見舟人焚香祈神云告紅頭須小使頭長年三老莫令錯呼錯喚問何謂長年三老云梢工是也長讀如長幼之長乃知老杜長年三老長歌裏白晝攤錢高浪中之語蓋如此因問

入蜀言 卷三
何謂攤錢云博也按梁冀能意錢之戲注云
卽攤錢也則攤錢之爲博亦信矣過網步有
二十餘家在夕陽高柳中短籬曬罾小艇往
來正如畫圖所見沌中之最佳處也泊畢家
池地勢爽塏居民頗衆有一二家雖茅茨結
廬而窗戶整潔藩籬堅壯舍旁有果園甚盛
蓋亦一聚之雄也與諸子及二僧步登岸遊
廣福永固寺間然無一人東偏白雲軒前橙

方結實雖小而極香相與烹茶破橙抵暮乃
還舟中畢家池蓋屬復州玉沙縣滄浪鄉云

五日泊紫湄

六日過東場並水皆茂竹高林隄淨如掃雞犬
閒暇鳧鴨浮没人往來林樾間亦有臨渡喚
船者使人恍然如造異境舟人云皆村豪園
廬也泊雞鳴

七日泊湛江

八日早次江陵之建寧鎮蓋沌口也晉王澄棄
荊州別駕郭舒不肯從澄下乃留留屯沌口
陳侯安都討王琳至沌口皆此地也阻風大
魚浮水中無數凡行沌中七日自是泛江入
石首縣界夜觀隔江燒蘆場煙焰亘天如火
城光照舟中皆赤

九日早謁后土祠道旁民屋苫茅皆厚尺餘整
潔無一枝亂掛帆拋江行三十里泊塔子磯

江濱大山也自離鄂州至是始見山買羊置
酒蓋村步以重九故居一羊諸舟買之俄頃
而盡求菊花於江上人家得數枝芬馥可愛
爲之頽然徑醉夜雨極寒始覆絮衣

十日阻風雨遣小舟橫絕江面至對岸買肉食
得大魚之半又得一烏牡鷄不忍殺畜於舟
中俄有村翁持菱葫一束來餉不肯受直遣
人先之夔晚晴開船窻觀月

十一日舟行望西南一角水與天接舟人云是
為潛軍港古嘗潛軍伺敵於此遙見港中有
兩點正黑疑其遠樹則下不屬地久之漸近
可辨蓋二千五百斛大舟也又有水禽雙浮
江中色白類鶩而大楚人謂之天鶩飛騫絕
高有弋得者味甚美或曰即鵠也泊三江口
水淺舟行甚艱自此遂不復有山太白詩山
隨平野盡江入大荒流蓋荆渚所作也

十二日過石首縣不入石首自唐始為縣在龍
蓋山之麓下臨漢水亦形勝之地杜子美有
送石首薛明府詩即此邑也泊藕池

十三日泊柳子夜過全證二僧舟中聽誦梵語
般若心經此經惟蜀僧能誦

十四日次公安古所謂油口也漢昭烈駐軍始
更令名規模氣象甚壯兵火之後民居多茅
竹然茅屋尤精緻可愛井邑亦頗繁富米斗

六七十錢知縣右儒林郎周謙孫來湖州人
遊二聖報恩光孝禪寺二聖謂青葉髻如來
婁至德如來也皆示鬼神力士之形高二丈
餘陰威凜然可畏正殿中爲釋迦右爲青葉
髻號大聖左爲婁至德號二聖三像皆南面
予按藏經駒字函娑羅浮殊童子成道爲青
葉髻如來青葉髻如來再出世爲樓至如來
則二如來本一身耳有碑言邑人一夕同夢

二神八言我青葉髻婁至德如來也有二巨
木在江干我所運者俟鄣行者來令刻爲我
像已而果有人自稱鄣行者又善肖像邑人
欣然請之像成人皆謂酷類所夢然碑無年
月不知何代也長老祖珠南平軍人寺後有
廢城髣髴尚存圖經謂之呂蒙城然老杜乃
曰地曠呂蒙營江深劉備城蓋玄德子明皆
屯於此也老杜曉發公安詩注云數月憩息

此縣按公移居公安詩云水煙通徑艸秋露
接園葵而留別公安太易沙門詩云沙村白
雪仍含凍江縣紅梅已放春則是以秋至此
縣暮冬始去其日數月憇息蓋爲此也泊彌
節亭馴鷗低飛往來竟日不去

十五日周令說縣本在近北枕漢水沙虛岸摧
漸徙而南今江流乃昔市邑也又云縣有五
鄉然共不及二千戶地曠民寡如此民耕尤

苦隄防數壞歲歲增築不止晚携家再遊二
聖寺衆寮有維摩刻木像甚佳云沙市工人
所爲也方丈西有竹軒頗佳珠老說五祖法
演禪師初住四面山孑然獨處凡二年始有
一道士來問道乃請作知事又三年僧寶良
來與道士朝夕叅叩皆得法於是演公之道
寢爲人知而四方學者始稍有至者雖其後
門人之盛稱天下然終身不過數十衆珠聞

此於其師也菴顏禪師荊州絕無禪林惟二
聖而已然蜀僧出關必走江浙回者又已自
謂有得不復參叩故語云下江者疾走如煙
上江者鼻孔撩天徒勞他二佛打供了不見
一僧坐禪

十六日過白湖渺然無津拋江至升子鋪有天
鷺數百翔泳水際日入泊沙市自公安至此
六十里自此至荆南陸行十里舟不復進矣

老杜詩云買薪猶白帝鳴榔已沙頭劉夢得
云沙頭檣干上始見春江濶皆謂此也

十七日日入後遷行李過嘉州趙青船蓋入峽
船也沙市堤上居者大抵皆蜀人不然則與
蜀人爲婚姻者也

十八日見知府資政殿學士劉恭父珙通判右
奉議郎權嗣衍左宣教郎陳孺荆南圖經以
爲楚之郢都梁元帝亦嘗都焉唐爲江陵府

荆南節度今因之然牧守署衙但云知荆南
軍府與永興河陽正同初無意義但沿舊而
已

十九日郡集於新橋馬監監在西門外四十里
自出城卽黃茅彌望每十餘里有村疇數家
而已道遇數十騎從獵獲狐兔皆繫鞍上割
鮮藉艸而飲云襄陽軍人也是日極寒如窮
冬土人云此月初已常有雪

二十日倒檣竿立 牀蓋上峽惟用 及百丈
不復張帆矣百丈以巨竹四破爲之大如人
臂予所乘千六百解舟凡用 六枝百丈兩
車

二十一日劉師丁內艱分迂兵之半負肩輿自
山路先歸夔州是日重霧四塞

二十二日五鼓赴能仁院建會慶節道場申夜
後舟人祀峽神屠一豨

入蜀記 卷三
二十三日奠劉帥母安定郡太夫人卓氏劉帥
受吊禮與吳人同

二十四日見左朝奉郎湖北安撫司王管機宜
文字牛達可右奉議郎安撫司幹辦公事湯
衡右朝奉郎安撫同幹辦公事趙蘊

二十五日右文林郎知歸州興山縣高祁來
二十六日修船始畢骨肉入新船祭江瀆廟用
壺酒特豕廟在沙市之東三四里神曰昭靈

乎應威惠廣源王蓋四瀆之一最爲興祀之
正者然兩廡淫祠尤多蓋荆楚舊俗也司法
參軍右迪功郎王師點錄其叔祖君儀待制
訟卦講義來君儀嚴州人師事先大父精於
易然遺書不傳講義止存一篇而已然亦其
少作也

陳眉公訂正入蜀記卷之三

終

蜀記卷之三
陳眉公訂正入蜀記卷之三

及然... 猶往... 參軍... 一五... 平... 是...

陳眉公訂正入蜀記卷之四

宋陸 游務觀 著

明 沈麟禎 虎丞 同校
沈德先 天生

二十七日解舟擊鼓鳴舟人皆大噪擁堤觀者如堵墻泊新河口距沙市三四里蓋蜀人修船處

二十八日泊方城有嘉州人王百一者初應募

爲船之招頭招頭蓋三老之長顧直差厚每祭神得胙肉倍衆人旣而船戶趙清改用所善程小八爲招頭百一失職怏怏又不決去遂發狂赴水予急遣人拯之流一里餘三沒三踊僅得出一招頭得喪能使人至死况大於此者乎

二十九日阻風

十月一日過瓜州壩倉頭百里洲泊沱滙皆聚

落竹樹鬱然民居相望亦有村夫子聚徒教授羣童見船過皆挾書出觀亦有誦書不輟者沱江別名詩江有沱禹貢岷山導江東別爲沱是也滙則爾雅所謂春夏秋有水冬無水曰滙也

二日泊桂林灣全證二僧陸行來云公路民居大抵多四方人土着財十一也舟人殺猪十餘口祭神謂之開頭

三日舟人分胙行差晚與兒輩登隄觀蜀江乃
知李太白荆門望蜀江詩江色綠且明爲善
狀物也自離塔子磯至是始望見巴山山在
松滋縣泊灌子口蓋松滋枝江兩邑之間松
滋晉縣自此入蜀江枝江唐縣古羅國也江
陵九十九洲在焉晉柳約之羅述甄季之聞
桓玄死自白帝至枝江卽此地也歐陽文忠
公有枝江山行五言二十四韻蓋文忠赴夷

陵時自此陸行至峽州故其望州坡詩云崎
嶇幾日山行倦却喜坡頭見峽州灌子口一
名松滋渡劉賓客有詩云巴人淚應猿聲落
蜀客船從鳥道回

四日過楊木寨蓋松滋有四寨曰楊木車羊高
平稅家云泊龍灣

五日過白羊市蓋峽州宜都縣境上宜都唐縣
也謁張文忠公天覺墓殘伐墓木橫道幾不

可行天覺之子直龍圖閣茂已卒二孫一有
官病狂易一白丁也初作墓江濱已而不果
葬改葬山間今墓是也而舊墓亦不復毀啓
隧道出入中可容數十人坐有道人結屋其
旁守之道人出一石刻艸書云莫將外物尋
奇寶須問真師決永鈇寄八瓊張子高鍾離
權始自王屋遊都下弟子浮玉山山人來乞此
字今又將西還丹元子再請書卷之末紹聖

元年仲冬望日權卽世所謂鍾離先生子高
卽天覺丹元子卽東坡先生與之疇倡者後
有魏泰道輔跋云天覺修黃籙醮法成浮玉
山人謂之曰上天錄公之功爲須彌山八瓊
洞主宜刻印謝帝而佩之天覺不以爲信故
浮玉又出鍾離公書爲證後丹元子又爲天
覺求書卷末又有徐注者跋云天覺舟過真
州方出謁有布衣幅巾者徑入舟中索筆

書間人呂洞賓來謁張天覺十字擲筆卽去
而天覺適歸墨猶未乾注真州人云親見之
墳前碑樓壁間有詩一篇云秋風十驛望台
星想見冰壺照坐清霖雨已回公旦駕挽須
聊聽野王箏三朝元老心方壯四海蒼生耳
已傾白髮故人來一別却歸林下看昇平蓋
魏道輔贈天覺詩後人所題者唐立夫舍人
亦有一詩末句云無碑堪墮淚著句與招魂

宜都知縣右文林郎呂大辨來泊赤崖

六日過荆門十二碛皆高崖絕壁嶄巖突兀則
峽中之險可知矣過碛望五龍及雞籠山巖
峩正如夏雲之奇峯荆門者當以險固得名
碛上有石穴正方高可通人俗謂之荆門則
妄也晚至峽州泊至嘉亭下峽州在唐爲硤
州後改峽而印文則爲陝州元豐中郎官何
洵直建言陝與陝相亂請改鑄印文從山事

下少府監而監丞歐陽發言湖北之陝州從

阜從夾

夾從兩人

陝西之陝州從阜從夾

夾從兩人

偏

旁不同本不相亂恐四方謂少府監官皆不識字當時朝士之議皆是發而卒從洵直言改鑄云至喜亭記歐陽公撰黃魯直書

七日見知州右朝奉大夫葉安行字履道以小舟遊西山甘泉寺竹橋石磴甚有幽趣有靜練洗山二亭下臨江山頗疎豁法堂之右小

徑數十步至一泉曰孝婦泉謂姜詩妻龐氏也泉上亦有龐氏祠然歐陽文忠公不以爲信故其詩曰叢祠已廢姜祠在事迹難尋楚語訛又此篇首章云江上孤峯蔽綠蘿初讀之但謂孤峯蒙蘿耳及至此乃知山下爲綠蘿谿也又至漢景帝廟及山東寺景帝不知何以有廟於此歐陽公爲令時有所雨文在集中東山寺亦見歐陽公詩距望京門五

里寺外一亭臨小池有山如屏環之頗佳亭
前冬青及栢皆百餘年物遂至夷陵縣令見
縣左從政郎胡振事東至喜堂郡守朱虞
部爲歐陽公所築者已焚壞柱礎尚存規模
頗雄深又東則祠堂亦簡陋肖像殊不類可
歎聽事前一井相傳爲歐陽公所浚水極甘
寒爲一郡之冠井旁一柵合抱亦傳爲公平
植晚郡集於楚塞樓遍歷爾雅臺錦障亭亭

前海棠二本亦百年物爾臺者圖經以爲
郭景純註爾雅於此又有絳雪亭取歐陽公
千葉紅梨詩而紅梨已不存矣

八日五鼓盡解船過下牢關夾江千峰萬嶂有
競起者有獨拔者有崩欲壓者有危欲墜者
有橫裂者有直坼者有凸者有窪者有罅者
奇怪不可盡狀初冬艸木皆青蒼不彫西望
重山如闕江出其間則所謂下牢谿也歐陽

文忠公有下牢津詩云入峽山漸曲轉灘山
更多卽此也繫船與諸子及證師登三游洞
躡石磴二里其險處不可着脚洞大如三間
屋有一穴通人過然陰黑峻嶮尤可畏繚山
腹偃僂自巖下至洞前差可行然下臨溪潭
石壁十餘丈水聲恐人又一穴後有壁可居
鍾乳歲久垂地若柱正當穴門上有刻云黃
大臨弟庭堅同辛紘子大方紹聖二年三月

辛亥來遊旁石壁上刻云景祐四年七月十
日夷陵歐陽永叔下缺一字又云判官丁下
又缺數字丁者實臣也字元珍今丁字下二
字亦髣髴可見殊不類元珍字又永叔但曰
夷陵不稱令洞外溪上又有一崩石偃仆刻
云黃庭堅弟叔向子相姪橄同道人唐履來
游觀辛亥舊題如夢中事也建中靖國元年
三月庚寅按魯直初謫黔南以紹聖二年過

入蜀記
卷四
九
此歲在乙亥今云辛亥者誤也泊石碑峽石
穴中有石如老翁持魚竿狀略無少異
元日微雪過扇子峽重山相掩政如屏風扇疑
以此得名登蝦蟆碛水晶所載第四泉是也
蝦蟆在山灑臨江頭鼻吻頷絕類而背脊炮
處无逼真造物之巧有如此者自背上深入
得一洞穴石色綠潤泉泠泠有聲自洞出垂
蝦蟆口鼻間成水簾入江是日極寒巖嶺有

積雪而洞中溫然如春碛洞相對稍西有一
峯孤起侵雲名天柱峯自此山勢稍平然江
岸皆大石堆積彌望正如濬渠積土狀晚次
黃牛廟山復高峻村人來賣茶菜者甚衆其
中有婦人皆以青斑布帕首然頗白哲語青
亦頗正茶則皆如柴枝艸葉苦不可入口廟
靈感神封嘉應保安侯皆紹興以來制書也
其下卽無義灘亂石塞中流望之可畏然舟

過乃不甚覺蓋操舟之妙也傳云神佐夏禹
治水有功故食于此門左右各一石馬頗卑
小以小屋覆之其右馬無左耳蓋歐陽公所
見也廟後叢木似冬青而非莫能名者落葉
有黑文類符篆葉葉不同兒輩亦求得數葉
歐詩刻石廟中又有張文忠一贊其詞曰壯
哉黃牛有大神力輦聚巨石百千萬億劔戟
齒牙礫碗江側壅激波濤險不可測威脅舟

人駭怖失色刳羊醜酒千載廟食張公之意
似謂神聚石壅流以脅人求祭饗使神之用
心果如此豈能巍然廟食千載乎蓋過論也
夜舟人來告請無擊更鼓云廟後小中多虎
聞鼓則出

十日早以特豕壺酒祭靈感廟遂行過鹿角虎
頭史君諸灘水縮已三之二然湍險猶可畏
泊城下歸州秭歸縣界也與兒曹步沙上回

望正見黃牛峽廟後山如屏風疊峩峩插天
第四疊上有若牛狀其色赤黃前有一人如
着帽立者昨日及今早雲冒山頂至是始見
之因至白沙市慈濟院見主僧志堅問地名
城下之由云院後有楚故城今尚在因相與
訪之城在一岡阜上甚小南北有門前臨江
水對黃牛峽城西北一山蜿蜒回抱山上有
伍子胥廟大抵自荆以西子胥廟至多城下

多巧石如靈壁湖口之類

十一日過達洞灘灘惡與骨肉皆乘轎陸行過
灘灘際多奇石五色粲然可愛亦或有文成
物象及符書者猶見黃牛峽廟後山太白詩
云三朝上黃牛三暮行太遲三朝又三暮不
覺鬢成絲歐陽公云朝朝暮暮見黃牛徒使
行人過此愁山高更遠望猶見不是黃牛滯
客舟蓋諺謂朝見黃牛暮見黃牛一朝一幕

黃牛如故故二公皆及之歐陽公自荆渚赴
夷陵而有下牢三游及蝦蟆碚黃牛廟詩者
蓋在官時來游也故憶夷陵山詩云憶嘗祇
吏役鉅細悉經覲其後又云荒烟下牢戍百
仞塞溪漱蝦蟆噴水簾甘液勝飲酌亦嘗到
黃牛泊舟聽猿狖也晚泊馬肝峽口兩山對
立修聳摩天路如廬山江岸多石百丈縈絆
極難過夜小雨

十二日早過東瀨灘入馬肝峽石壁高絕處有
石下垂如肝故以名峽其傍又有獅子巖巖
中有一小石罇踞張頤碧艸被之正如一青
獅子微泉泠泠自巖中出舟行急不能取嘗
當亦佳泉也溪上又有一峯孤起秀麗略如
小孤山晚抵新灘登岸宿新安驛夜雪
十三日舟上新灘由南岸上及十七八船底爲
石所損急遣人往拯之僅不至沉然銳石穿

船底牢不可動蓋舟人載陶器多所致新灘
兩岸南曰官漕平北曰龍門龍門水尤湍急
多暗石官漕差可行然亦多銳石故爲峽中
最險處非輕舟無一物不可上下舟人冒利
以至此可爲戒云遊江濱北廟廟正臨龍門
其下石罅中有溫泉淺而不涸一村賴之婦
人汲水皆背負一全木盎長二尺下有三足
至泉旁以杓挹水及八分卽倒坐旁石束盎

背上而去大抵峽中負物率着背又多婦人
不獨水也有婦人負酒賣亦如負水狀呼買
之長跪以獻未嫁者率爲同心髻高二尺插
銀釵至六隻後插大象牙梳如手大

十四日留驛中晚以小舟渡江南登山至江濱
南廟新修未畢有一碑前進士曾華旦撰言
因山崩石壅成此灘害舟不可計於是著令
自十月至二月禁行舟知歸州尚書都官員

外郎趙誠聞于朝疏鑿之用工八十日而灘
害始去皇祐三年也蓋江絕於天聖中至是
而復通然灘害至今未能悉去若乘十二月
正月水落石盡出時亦可併力盡鑿去銳石
然灘上居民皆利於敗舟賤賣板木及滯留
買賣必搖沮此役不則賂石工以爲石不可
去須斷以必行乃可成又舟之所以敗皆失
於重載當以大字刻石置驛前則過者必自

懲創二者皆不可不講當以告當路者

十五日舟人盡出所載始能挽舟過灘然須修
治遂易舟離新灘過白狗峽泊舟與山口肩
輿遊玉虛洞去江岸五里許隔一溪所謂香
溪也源出昭君村水未美錄於水晶色碧如
黛呼小舟以渡過溪又里餘洞門小纔袤丈
旣入則極大可容數百人宏敞壯麗如入大
宮殿中有石成幢蓋幡旗芝艸竹笋仙人龍

虎鳥獸之屬千狀萬態莫不逼真其絕異者
東石正圓如日西石半規如月予平生所見
巖竇無能及者有熙寧中謝師厚岑巖起題
名又有陳堯咨所作記敘此洞本末云唐天
寶中獵者始得之北歸已夜風急不可秉燭
炬然月明如晝兒曹與全師皆杖策相從殊
不覺崖谷之險也

十六日到歸州見知州右奉議郎賈選子公通

判左朝奉郎陳端彥民瞻館於報恩光孝寺
距城一里許蕭然無僧歸之爲州纔三四百
家負臥牛山臨江州前卽人鮪壘城中無尺
寸平土灘聲常如暴風雨至隔江有楚王城
亦山谷間然地比歸州差平或云楚始封於
此山海經及啓封孟除於丹陽城郭璞注云
在秭歸縣南疑卽此也然史記成王封熊繹
於丹陽裴駘乃云在枝江未詳孰是

十七日郡集於望洋堂玩芳亭亦皆沙石犂
之地賈守云州倉歲收秋夏二料麥粟粃米
共五千餘石僅比吳中一下戶耳
十八日初得艤船美小然底闊而輕於上灘爲
便

十九日郡集於歸鄉堂欲以是晚行不果訪宋
玉宅在秭歸縣之東今爲酒家舊有石刻宋
玉宅三字近以爲人避太守家諱去之或遂

由此失傳可惜也

二十日早離歸州出巫峰門過天慶觀少留觀
唐天寶元年碑載明皇夢老子事巴東太守
劉瑀所立字畫頗清逸碑側題當時郡官吏
胥姓名字亦佳又有周顯德中荆南判官孫
光憲爲知歸州高從讓所立碑從讓蓋南平
王家子弟光憲亦知名國史有事迹蓋五代
時歸峽皆隸荆渚也殿前有栢數百年物觀

下卽吒灘亂石無數飯于靈泉寺遂登舟過
業灘亦名灘也水落舟輕俄頃遂過

二十一日舟中望石門關僅通一人行天下至
險也晚泊巴東縣江山雄麗大勝秭歸但井
邑極於蕭條邑中纔百餘戶自令解而下皆
茅茨了無片瓦權縣事秭歸尉右迪功郎王
康年尉兼主簿右迪功郎杜德先來皆蜀人
也謁寇萊公祠堂登秋風亭下臨江山是日

重陰微雪天氣颼颼復觀亭名使人悵然始
有流落天涯之歎遂登雙柏堂白雲亭堂下
舊有萊公所植柏今已槁死然南山重複秀
麗可愛白雲亭則天下幽奇絕境羣山環擁
層出間見古木森然往往二三百年物欄外
雙瀑瀉石澗中跳珠濺玉冷入人骨其下是
爲慈溪奔流與江會予自吳入楚行五千餘
里過十五州亭榭之勝無如白雲者而止在

縣解聽事之後巴東了無一事爲令者可以
寢飯於亭中其樂無涯而闕令動輒二三年
無肯補者何哉

二十二日發巴東山益奇怪有夫子洞者一竇
在峭壁絕高處人迹所不可至然髣髴若有
欄楯不知所謂夫子者何也過三分泉自山
竇中出止兩派俗云三派有年兩派中熟一
派或絕流饑饉泊疲石夜雨

二十三日過巫山凝真觀謁妙用真人祠真人
卽世所謂巫山神女也祠正對巫山峰巒上
入霄漢山脚直插江中議者謂太華衡廬皆
無此奇然十二峯者不可悉見所見八九峯
惟神女峯最爲纖麗奇峭宜爲仙真所託祝
史云每八月十五夜月明時有系竹之音往
來峯頂山猿皆鳴達旦方漸止廟後山半有
石壇平曠傳云夏禹見神女授符書于此壇

上觀十二峯宛如屏障是日天宇晴霽四顧
無纖翳惟神女峰上有白雲數片如鸞雀翔
舞裴徊久之不散亦可異也祠舊有鳥數百
送迎客舟自唐夔州刺史李貽詩已云羣鳥
幸胙餘矣近乾道元年忽不至今絕無一鳥
不知其故泊清水洞極深後門自山後出
但黥闇水流其中鮮能入者歲旱祈雨頗應
權知巫山縣左文林郎冉徽之尉右迪功郎

文庶幾來

二十四日早抵巫山縣在峽中亦壯縣也市井
勝歸峽二郡隔山南陵山極高大有路如綫
盤屈至絕頂謂之一百八盤蓋施州正路黃
曾直詩云一百八盤携手上至今歸夢繞羊
腸卽謂此也縣廨有故鐵盆底銳似半甕狀
極堅厚銘在其中蓋漢永平中物也缺處鐵
色光黑如佳漆字畫淳質可愛玩有石刻曾

直作盆記大略言建中靖國元年予弟叔向
嗣直是涪陵尉攝縣事予起戎州來寓縣解
此盆舊以種蓮余洗滌乃見字云遊楚故離
宮俗謂之細腰宮有一池亦當時宮中燕遊
之地今煙沒略盡矣三面皆荒山南望江山
奇麗又有將軍墓東晉人也一碑在墓後跌
陷入地碑傾前欲壓字總半存

二十五日晡後至大溪口泊舟出美梨大如升

二十六日發大溪口入瞿唐峽兩壁對聳上入
霄漢其平如削成仰視天如足練然水已落
峽中平如油盎過聖姥泉蓋石上一罅人大
呼于旁則泉出屢呼則屢出可怪也晚至瞿
唐關唐故夔州與白帝城相連杜詩云白帝
夔州各異城蓋言難辨也關西門正對灩澦
堆二碎石積成出水數十丈土人云方夏秋
水漲時水又高于堆數十丈肩輿入關謁白

帝廟氣象甚古松栢皆數百年物有數碑皆孟蜀時所立庭中石筍有黃魯直建中靖國元年題字又有越公堂隋楊素所創少陵爲賦詩者已毀今堂近歲所築亦甚宏壯自閔而東卽東屯少陵故居也

二十七日早至夔州二在山麓沙上所謂魚復永安宮也宮今爲州倉而州治在宮西北甘夫人墓西南景德中轉運使丁謂薛顏所徙

比白帝頗平曠然失閔險無復形勢在瀼之西故一曰瀼西土人謂山間之流通江者曰瀼云州東南有八陣磧孔明之遺迹碎石行列如引繩每歲江漲磧上水數十丈比退陣石如故

陳眉公訂正入蜀記卷之四 終



取收臣縣兵處工銀數上米幾十文此是軒
 憲云州東南有人斬觀其即之費亦極可計
 西苑一曰窳西土人謂山間之窳處也昔曰
 此自帝設平郡然夫閑劍無財紙獲其窳之

